

Saveeŋ Tau Tiboode Ila Pa Yes Hibrua Hibru—Hebrews

Maaron Naatu ta ipaghazonjai ghiit pa Taama Maaron

¹ Muuŋ, Maaron isavia aliija pa propet tooni pai katini ila eez maata maata. Tauta tigham aavo, ve tivotia aliija pa timbuunja. ² Eemon aazne, taleep ila saawe paaghu tau Maaron ighe ipasov uraat tooni. Tauvene saawe tane, iit talooŋ Maaron aliija ila tauu Naatu aavo. Saawe tau Maaron ighur sambam ve taan tomania gabua naol isov, i ighur zi tivot ila Naatu tawe niima. Ve i ighe ighur gabua naol isov tawe timin Naatu le, lesu inŋin zi.
*

³ I ta imin ghazonja pait ve isul ghiit, ve ipaghazonjai ghiit pa Taama Maaron tapiri ve poia tooni. Igham Taama Maaron naagho kat. Maaron tapiri ve nŋar isov tau igheen tooni, ene ighenaar to Naatu paam. Saveeŋ tooni, ene tapiri tiina kat, ve ikis gabua naol isov tigheen tunja. I imaat gha ireu sosor toit, ve igham ghiit tanjalaan ila Maaron maata. Ra imuul izala pa sambam, ve mboole izi ila Maaron saksaki tauu niima tapir. *

Maaron Naatu iliiv yes aŋela

* **1:2:** Mt 11:27; Yo 1:3; Kol 1:16; Hib 12:25
16:19; Kol 1:15+

* **1:3:** Yo 1:14; Mk

⁴ Tauvene Maaron Naatu iliiv yes aņela kat. Pasaa, eeza tau Maaron igham pani na, ene tiina ve poia kat iliiv yes aņela ezazi. *

⁵ Pasaa, Maaron isaav pa Naatu ighe:

“Aazne yau nasaav ghazonņa tauvene: Yau natug yo. Yo tamam ta yau. Aazne, yau naghur ghom pa uraat.” *

Ve isaav muul ighe:

“I taama yau, ve i yau natug.” *

Maaron isavia saveeņ tauvene pa aņela eta mako. Saveeņ tane iņarui Naatu mon.

⁶ Ve saawe tau Maaron ighe imbaaņ Naatu aidaaba izilam taan, i isaav tauvene:

“Aņela tisov to Maaron aat tiput aghezi pani, ve tipakuru.” *

⁷ Ve yes aņela, Maaron isavi zi ighe:

“Aņela, ene uraata tooni tau tibesbees pani. I igham zi timin yaghur ve yav yaama.” *

⁸ Eemon i isavia Naatu ighe:

“Maaron, pooz tsio irau isov ne mako. Uleep ila niam to ghamuņ pooz irau saawe.

Ve ilaal to pooz tsio, ene ņgar duduņa.

⁹ Yo lolom pa ņgar duduņa, ve ughurghur koi pa ņgar sasaghati tau isapir pa tutuņ.

Tauvene Maaron tsio ipakur ghom le uliiv zetamņa siriv, ve iliņ ņgoreeņ izala pavom to ighur ghom umin kinik.

Tauta igham ghom lolom poia le poia kat.” *

* **1:4:** Pil 2:9+ * **1:5:** Mbo 2:7; Mt 3:17; Hib 5:5 * **1:5:** 2Sam 7:14 * **1:6:** Mbo 97:7 * **1:7:** Mbo 104:4 * **1:9:** Mbo 45:6+

¹⁰ Ve saveeņ ziiri ite tau iņarui Maaron Naatu na isaav tauvene ighe:

“Tiina, muuņ geeg, yo ughur taan, ve ugharaat puughu le iyaryaņ. Ve sambam saamba paam, ene nimam muuri.

¹¹⁻¹² Sambam saamba ve taan pale tisaghat imin uuli tau muņginaņ gha perekia.

Tauvene yo pale ululun zi imin nonoghiņa muņgaana,

ve uyol zi pa sambam saamba paaghu ve taan paaghu.

Eemon yo, o ulepleep mon tauvene. Saawe tsio irau isov mako. Pale iseņseeņa tauvene gha ila.” *

¹³ Ve muuņ, Maaron isaav pa Naatu ighe:

“Ulam mbolem izi ila pa nimag tapir, le irau natatan koiamņa ve tapirizi isov kat, ve uvaghaaz zi ila aghem saamba.” *

Aghita. Saawe eta, i isaav tauvene pa aņela eta? Mako. Saveeņ tane iņarui Naatu mon. ¹⁴ Pasaa, aņela, yes besoonņa to Maaron. I imbaņmbaaņ zi to tiuul yes tau i ighe igham mulin zi. *

2

Taghur muriin pa Uleeņa toit Krisi sov

¹ Tauvene Maaron aliiņa tau taloonņa na, iit aat mataan kisini ve tataghoni kat. Mako pale tapul Maaron imin waņ gogoon tau waņjaar igherevu gha imoghan ilale. ² Aghita. Maaron aliiņa

* **1:11-12:** Mbo 102:25; Hib 13:8; Yems 1:17; 2Pe 3:13 * **1:13:**

Mbo 110:1; Mk 12:36 * **1:14:** Mbo 34:7, 91:11, 103:20; Mbaņ 12:7

tau muun yes Israela tiloonja ila yes anjela avozi na, ene onoon ve igheen ariaan. Tamtamon tisov tau titaghoni mako, ve timalaan pani, ene Maaron ighurghur zi mako. Yes tisov tigham atuya iduduun pa sosor toozi. ³ Ve uraat tau Yesu ighamu to igham mulin ghiit na, ene tiina le tiina kat. Tauvene isaav ighe loloon iveghaini ve tapul njar pani, pale tapaghau tauun pa Maaron aatyavyav tooni mindai? Mako. *

Uleen tana, Tiina toit Yesu ivotia imin maata. Ra yes tau tiloon saveen ila tooni na, anazi tipalot saveenja pait. *

⁴ Ve Maaron ipariaan saveen tana paam. Pasaa, irei uraat ve tapiri maata maata to Avuvu Patabuyaana pa tamtamon tooni itaghon i tauu loolo. Ve ipalot zi gha tigham uraat tintiina ve gabua ngeretazi maata maata tau itotoi ighe i ileep tomani zi pa uraat toozi. *

Maaron itatan Yesu eeza, ve murei ra igham eeza ivot imin tiina muul

⁵ Sambam paaghu ve taan paaghu tau nisavia ne, Maaron ighur yes anjela pa nginiin zi mako.

⁶ Pasaa, Maaron aliina ziiri ee tau neer ee ivotia na, isaav ighe: *

* **2:3:** Hib 10:28, 12:25 * **2:3:** Mk 1:14+; Mbanj 1:8; 1Yo 1:1+

* **2:4:** Mk 16:20+; Mbanj 14:3; 1Kor 12:4-11 * **2:6:** Saveen tau

igheen ila rau to mboun na, isavia iit tamtamon to taan. Eemon neer tau ibood saveen to Buk Hibru na, igham njar ighe saveen tane iduduun kat pa Yesu. Pasaa, i eeza tiina kat. Iliiv yes anjela. Eemon saawe tau izilam taan, i itatan tauu eeza. Ve saawe tau imuul izala pa sambam, i igham eeza tiina kat, ve Maaron ighur gabua naol isov ila i niima, to injin zi.

“Maaron, yei tamtamon to taan nimin saa kaut poia, ta yo matam inġalġal ghei?
Ve yei tamtamon natuzġa, mindai ta yo matam payei? *

⁷ Yo ughur ghei, ve ugham ghei nizi rig pa yes aġela.

Ve upakur ghei, ve ugham ezamai ivot imin tiina.

⁸ Ve ughur gabua naol isov ila yei sambamai, leso niġgin zi.”

Saawe tau Maaron ighur gabua naol isov ila iit tamtamon sambaan, i inġuruut gabua eta mako. Ighur gabua isov tighenaar ila iit sambaan. Onoon aazne, taghita anooġa soone. Pasaa, gabua isov tigheen ila iit tamtamon sambaan soone. *

⁹ Eemon Yesu, o iit taghita. I iparav ariaaġ le iliiv. Tauta aazne, Maaron ipakuru, ve igham eeza ivot imin tiina kat. Saawe tuuku tau Yesu ileep izi taan, Maaron itatan eeza ve ighuru izi rig pa yes aġela. Pasaa, i ighe igham poghani ghiit ve igham mulin ghiit pa mateegh. Tauta Yesu igham iit tasov niaan, ve igham yavyavuunġ tiina, ve imaat. *

Yesu irau iuul ghiit pasaa, i tamtamon imin iit

¹⁰ Maaron imin puughu pa gabua isov, ve ighur gabua isov tivot pa i tauu. I ighe igham tamtamon katini timin i natġa, ve igham zi tila tileep toman ia ila mbonari loolo izi sambam. Tauta igham Naatu Yesu iyamaan yavyavuunġ tiina. Nġar tooni tane iduduunġ. Pasaa, yavyavuunġ tau Yesu ibaado, tauta ighamu imin uleeġa poia ee. I irau imuunġ pa

* **2:6:** Mbo 8:4, 144:3 * **2:8:** Mt 28:18; 1Kor 15:25+; Ep 1:22

* **2:9:** Pil 2:7+; 1Yo 2:2; Syg 5:9

Maaron natŋa, ve iparav pazi, leso igham mulin zi.
*

11 Yesu tomania yes tau i igham zi timin tamtamon patabuyaana to Maaron na, lupuuŋ toozi eemon. Tauta maaya pa iwaat zi toŋvetaz tooni mako. *

12 Aghita. I isaav pa Maaron igha:

“Yau aat navotia ezam ve ŋgar tsio pa toŋvetaz tsiau.

Ve isaav igha tamtamon tsio tilup zi pa sunuuŋ, ene yau aat nala tomani zi, ve nam-bou to napait ezam.” *

13 Ve i isaav muul igha:

“Yau aat nanumeer Maaron.” *

Ve isavia saveeŋ ite igha:

“Ughita. Yau taug tane. Yenja geegeu tau Maaron igham zi payau ne, tauta nile-pleep.” *

14 Geegeu tau i isavi zi na, ene iit tamtamon to taan tau taghur ila tooni. Tauta Yesu paam imin tamtamon to taan raraate imin iit, ve iyamaan pataŋani naol to taan, ve imaat to ipasov Neer Saghati tapiri. Pasaa, i ta imin puughu pa mateegh ve ivavaghamunia tamtamon. *

15 Saawe isov tau iit taleep izi taan, iit tamin besoonja pa mateegh. Pasaa, taroiroi pani, ve roin tane ikis ghiit ariaan. Eemon mateegh to Yesu ipas ghiit pa pataŋani tane wa. **16** Iit tawatagh: Yesu ilam pa uleen yes aŋela mako. I ilam to iuul iit tau Abaram paaghu tooni ne. *

* **2:10:** Ro 11:36; Hib 5:8+ * **2:11:** Mk 3:35; Hib 10:10 * **2:12:**

Mbo 22:22 * **2:13:** Mbo 18:2 * **2:13:** Is 8:18; Yo 17:6, 9+

* **2:14:** Gnp 3:1+; Yo 1:14, 12:31; 2Tim 1:10 * **2:16:** Ga 3:7, 29

¹⁷ Puughu tane ta i ighita ighe i aat izilam taan, ve imin tamtamon raraate imin iit tonvetaz tooni, o poia. Leso imin daaba to watoonrau tau loolo isaghatin ghiit, ve igham poghania uraat tau Maaron ighuru ila niima na, ve ireu sosor toit, ve itatan aatyavyav to Maaron. *

¹⁸ I iyamaan tovaan ve patajanani naol to taan wa. Tauta i irau kat pa uleen yes tau tovaan igham zi. *

3

Yesu eeza tiina iliiv Mose

¹ Yam tonvetaz, poiñ to nugh sambam igham gham amin Maaron tamtamon tooni patabuyaanja wa. Tauvene matamim ingal poi pa Yesu. Iit taghur ila tooni ve tavotia vaaru taghe: I mbanjoanja to Maaron, ve daaba tauu to watoonrau. *

² Uraat tau Maaron ighuru ila niima na, i ighamu itaghon dudunai Maaron ngar tooni, raraate imin muun Mose igham dudunai uraat tau Maaron ighuru ila i niima na, ve ingin poghania Maaron ruum tooni. Ene yes Israela tau Maaron igham zi timin le na. *

³ Iit tawatagh: Isaav ighe neer eta irau ruum poia eta, ene aat tamtamon tipait ruum tana. Eemon neer tau irau ruum, o tipaiti kat. Ene raraate imin Mose ve Yesu. Yesu eeza iliiv Mose pasaa, Mose, i imin ruum mon. Ve Yesu, i imin neer tau irau ruum na. ⁴ Ruum ta naol ne, ene tamtamon tirau

* **2:17:** Pil 2:7; Hib 2:11, 3:1 * **2:18:** Mt 4:1+; Hib 4:15 * **3:1:**
Hib 2:17, 4:14, 12:2 * **3:2:** Nam 12:7

zi. Eemon Maaron ta ighur gabua naol isov tivot.
*

⁵ Mose, i besoonja to Maaron ve igham dudunjai uraat naol pa ruum to Maaron itaghton Maaron ngar tooni. Ve i isavia gabua siriv tau murei Maaron ivoti zi tivot tighazoon. ⁶ Eemon Krisi, i Maaron Naatu tau injin poghania ruum to Maaron itaghton Maaron ngar tooni. Ve ighe taroi mako, ve takis ghuruun ila toit tunja, ve taghur mataan pa lepoogh poia tau Maaron pale igham pait na ve tintiniin pani, ene pale tatotoi tauun taghe iit paam tamin ruum to Maaron. *

Yes tau tizoor Maaron aliija, irau tigham mariaon ila tooni mako

⁷⁻⁸ Tauvene aloon saveen tau Avuvu Patabuyaan ivotia pait. Ighes:

“Aazne, isaav ighe yam aloon Maaron aliija, na apoon lolomim pani sov.

Ve atoov Maaron ve azoor aliija imin muun timbumimja tighamu izi nugh nginaanja na sov.

⁹ Ndaman tamoot ru tau tileep izi nugh nginaanja, yau naghama uraat tintiina ila sosozi, ve tighita pa tauzi matazi.

Eemon tighur ilam tsiau mako, ve tinoknok tovaan ghau.

¹⁰ Tauta tigham ghau ateg yavyav kat, ve nasaav pazi naghe:

‘Zeran tawe lolozi pa titaghton eez tsiau mako. Ngar tau igheen ila lolozi we, iduduun mako. Tauta monmon tisor pa eez tsiau.’

* **3:4:** Gnp 1:1+ * **3:6:** 1Kor 3:16; 2Kor 6:16; Hib 6:11

11 Tauta nasaav ariaaŋ pazi toman ateg yavyav, ve napariaaŋ saveeŋ tsiau naghe: ‘Onoon kat. Nugh to mariaaŋ tau yau naghuru pazi na, yes irau tiloŋ tila mako le mako kat!’ ” *

12 Tauvene yam toŋvetaz, ayamaan gham: Mako pale ŋgar saghati igherev tsiam eta ve ipul ghuruuŋ ila tooni, mako ighur muuri pa Maaron maata yaryaare. 13 Saawe isov, yam aat avapaloti gham. Mako pale ŋgar saghati itombaan tsiam eta, mako ipoon loolo ve irau ighilaal Maaron muul mako. Uraat to palotiŋ tana, asakia ila saawe ite paam sov. Aghamu ta aazne. *

14 Saawe tau taghur ila to Krisi imin maata na, taghur ila tooni ariaaŋ. Iit aat tikis ghuruuŋ ila toit tunja tauvene le saawe toit isov. Leso tapagha-zoŋai tauun taghe iit etaan Krisi, ve talup tomania. *

15 Saveeŋa, Maaron isavia muuŋ wa. Ighe: “Aazne, isaav ighe yam alooŋ Maaron aliiŋa, na apoon lolomim pani imin timbumimŋa tau muuŋ tizoor Maaron aliiŋa izi nugh ŋginaaŋa na sov.” *

16 Laak, savunugha ta tilooŋ saveeŋ to Maaron ve tizoora? Ene yes eval tiina to Israel tau Mose igherev zi gha tipul Isip ve tila. 17 Ve savunugha ta Maaron aate yavyav pazi irau ndaman tamoot ru? Ene yes Israela tau tinoknok ghamuuŋ sosor.

* **3:11:** Nam 14:21-35; Mbo 95:7+; Mt 4:7 * **3:13:** 1Tes 5:11, 14; Hib 10:24+ * **3:14:** 1Kor 15:2; Hib 6:11, 10:35; Syg 2:25 * **3:15:** Mbo 95:7+; Hib 4:7

Tauta Maaron irav zi timataar gha patazi imin ngiriis izi nugh nginaanja. *

¹⁸ Ve savunugha ta Maaron isaav ariaan pazi, ve ipariaan saveen tooni ighe nugh to mariaon tau i ighuru pazi na, yes irau tilon tila mako? Saveen tane inarui yes tau tizoor i aliinja na. ¹⁹ Saveen isov tane ipaghazonai ghiit ighe: Yes Israela tighur ila mako, tauta irau tilon tila nugh to mariaon tau Maaron ighuru pazi na mako. *

4

Maaron imbu saveen pa tamtamon tooni ighe yes pale tigham mariaon ila tooni

¹ Tauvene Maaron imbu saveen pa tamtamon tooni ighe yes pale tigham mariaon ila tooni. *

Ve saveen mbuaan tawe ighengheen soone. Tauvene iit aat taroi ve mataan ingal tauun poi. Pa ighe tsiam eta itaghon eez to Krisi ila, eemon ipasov laghoon tooni mako, ve imuul izi eez livu-ugha, ene irau ighita saveen mbuaan tana anoonja mako. *

² Onoon, tivotia vaaru poia pait gha taloonja wa, imin muun eval tiina to Israel tiloon Maaron aliinja. Eemon saveen tawe iuul zi mako. Pasaa, saawe tau tiloonja na, tighur ila mako. ³ Aazne,

* **3:17:** Nam 14:1-35; 1Kor 10:1+ * **3:19:** Yo 3:36; Hib 4:6

* **4:1:** Mariaon tau Maaron igham pa tamtamon tooni, ene ngara tol. 1) Muun, Maaron igham yes Israela tilon tila taan Kanaan, lesa tigham taan tawe imin lezi ve tileep poi. 2) Aazne, Krisi igham ghiit tamariau pasaa, iit irau tanumeer uraat ve poia tooni to igham ghiit taduduun ila Maaron maata. 3) Murei, Maaron pale igham tamtamon tooni tila nugh sambam, lesa timariau ve tileep poi.

* **4:1:** Hib 3:14

iit tamtamon tau taghur ila to Krisi, tauta tagham mariaon ila tooni. Ve yes tau tighur ila mako na, irau tigham mariaon tana mako. Pasaa, Maaron isaav ighe: *

“Yau nasaav ariaan pazi toman ateg yavyav, ve napariaan saveen tsiau naghe:

‘Onoon kat. Nugh to mariaon ta naghuru pazi na, yes irau tilon tila mako le mako kat!’ ” *

Eemon mariaon tana ighengheen soone. Pasaa, muun geeg, saawe tau Maaron ighur sambam ve taan, i ipasov uraat tooni le isov. Ve aazne, i isasaan ghiit mon. ⁴ Aghita. Saveen tooni ziiri ee isaav ighe: “Saawe imin liim ve ru, Maaron imariau pa ghamuun uraat tooni ta naol ne.” *

⁵ Ve saveen ziiri ite isaav tauvene:

“Nugh to mariaon tau yau naghuru pazi na, yes irau tilon tila mako.” *

⁶ Tauvene saveen mbuaan to Maaron tau isaav ighe tamtamon tooni pale tigham mariaon ila tooni, ene ighengheen soone. Ve tamtamon siriv pale tighita saveen tane anoonja. Eemon yes tau tiloon mariaon tana vaaru imin maata na, tighita anoonja mako. Pasaa, tizoor Maaron aliinja.

⁷ Tauta Maaron ighur saawe ite to tamtamon tooni tigham mariaon tauu ila tooni. Saawe tana, tauta aazne tazaa pani wa. Aghita. Ndaman katini ilam ila, ve murei ra, Maaron ivotia mariaon tana saveenja ila David aavo ighe:

“Aazne, isaav ighe yam aloon Maaron aliinja, na apoon lolomim pani sov.” *

* **4:3:** Mt 11:28 * **4:3:** Mbo 95:11; Hib 3:11 * **4:4:** Gnp 2:2+

* **4:5:** Mbo 95:11 * **4:7:** Mbo 95:7+

⁸ Onoon, Yosua igham yes Israela tilonj tila taan Kanaan. Eemon i igham zi timariau kat mako. Pa imin ta i igham zi timariau kat, kananj irau Maaron isavia saawe ite paam to mariaonj mako.
*

⁹ Tauvene mariaonj tauu imin mariaonj to umbom patabuyaanj, ene ighengheen pa Maaron tamtamon tooni soone. ¹⁰ Isaav ighe tamtamon eta igham mariaonj tauu ila to Maaron, ene pale uraat tooni isov, ve imariau kat imin Maaron imariau indeenj saawe tau i ipasov uraat to ghuruunj sambam ve taan. *

¹¹ Tauvene iit aat tazuari ghiit kat le tagham mariaonj tana. Mako pale toit eta izoor Maaron imin yes Israela, ve itap pa ghuruunj ila tooni ve irau igham mariaonj tawe mako.

Saveenj to Maaron, ene maata kat

¹² Maaron aliinja, ene saveenj maata yaryaare, ve ighamgham uraat toman tapiri tiina. Ve saveenj tooni, ene maata kat. Iliiv mbuzaagh tau maata ru na. Tauta ingalngal katin loloon, ve ipagha-
zonjai ngar isov tau igheen ila loloon ne gha ivot ighazonj. Leso taghilaal ngar sindei ta ivot ila to Maaron Avuvu, ve ngar sindei ta ivot ila tauun ngar toit mon. *

¹³ Maaron, i maata malaua. Gabua naol isov tau i ighur zi na, eta iyoonj pani mako. Gabua isov tau ngozaanj, ene tigheen ghazonja ila i maata. Ve iit tasov pale tayooz ila i naagho, lesu tavotia ngar tau taghamgham zi na ila tooni, ve igabiiz ghiit. *

* **4:8:** Yos 22:4 * **4:10:** Syg 14:13 * **4:12:** Ep 6:17; Syg 1:16

* **4:13:** Mbo 33:13, 139:1+; 2Kor 5:10

Yesu, i daaba tauu to watoonrau

¹⁴ Tauvene ghuruuŋ ila toit tau tavovotia ne, iit takisi tunja. Pa iit leen daaba tiina ee to watoonrau. Ene Yesu. I Maaron tauu Naatu. I izala le ila peria geeg to Maaron ta sambam we, leso igham avoon ve isavia saveeŋ toit ila tooni. *

¹⁵ Onoon, iit tamtamon tapiriin imbolmbool. Eemon daaba toit to watoonrau tawe, i loolo isasaghatin ghiit. Pasaa, tovaan naol isov tau ivotvot pait ne, ene ivot pani paam, ve i iwatagh zi wa. Eemon i igham sosor eta mako. *

¹⁶ Tauvene iit taroi pa tala tagharau Maaron sov. Taghur sunjuuŋ toit inarui niia to ghamuuŋ pooz irau saawe. Pa poia tooni, ene tiina le tiina kat. Tauvene saawe tau patanani igham ghiit, i pale loolo isaghatin ghiit, ve iuul ghiit itaghon tauu poia tooni. *

5

Krisi, i ŋeer to watoonrau imin Melkizedek

¹ Daaba tisov to watoonrau, Maaron ipas zi ila tamtamon sosozi, ve ighur zi pa uraat. Leso tigham tamtamon naghozi ve tigham uratoi watoonrau toozi ila i naagho. Yes tighurghur paitoon to tamtamon ilala pa Maaron, ve tighamgham uratoi watoonrau toozi, leso Maaron ireu sosor toozi. *

* **4:14:** Hib 3:1, 6:11, 10:35+ * **4:15:** Mt 4:1+; 2Kor 5:21; Hib 2:17; 1Pe 2:22; 1Yo 3:5 * **4:16:** Ep 3:12; Hib 10:19+ * **5:1:** Hib 8:3

² Yes tau tikankaan pa Maaron aliinja ve tisor pa eez tooni na, daaba to watoonrau irau tigham ari-aanja pazi mako. Tisasavia saveen marowa pazi. Pasaa, tiwatagh: Yes paam tapirizi imbolmbool, ve tighamgham sosor. ³ Puughu tane ta daaba to watoonrau aat igham watoonrau pa rewaan tauu sosor tooni imin maata. Le isov, o igham pa sosor to tamtamon siriv. *

⁴ Daaba to watoonrau, i eeza tiina pa uraat tooni. Ve neer eta irau izazainj tauu pa uraat tane mako. Maaron tauu aat ipoi, ve ighur uraat tane pani, imin muun igham pa Aron. ⁵ Kresi tauvene paam. I ipakur ghi ve ighur tauu imin daaba to watoonrau mako. Maaron tauu ta ighuru pa uraat tane. Aghita. Muun, i isaav pani igha:

“Yau natug yo.

Yo tamam ta yau.

Aazne, yau naghur ghom pa uraat.” *

⁶ Ve saveen tooni ziiri ite isaav igha:

“Yo neer to watoonrau imin Melkizedek. Ve yo aat uleep tauvene taghon taghon gha ila.” *

⁷ Saawe tau Yesu imin tamtamon ve ileep izi taan, i isun pa Maaron igha iuule, ve itan raraini toman aliinja tiina ve maata suuru izi. Pasaa, i iwatagh: Maaron irau igham mulini pa mateegh. Ve Maaron iloon sunuun tooni. Pasaa, i iroron pa Maaron, ve ileep ila i saamba. *

⁸ Onoon, i Maaron tauu Naatu. Eemon patanjani naol tau i ibaad zi na, tauta igham ngar tooni

* **5:3:** Hib 7:27, 9:7 * **5:5:** Mbo 2:7; Mt 3:17; Hib 1:5 * **5:6:** Gnp 14:18+; Mbo 110:4; Hib 6:20 * **5:7:** Mk 14:35, 15:34; Yo 12:27; Pil 2:8+

ighazonj kat pa ngar to taghoniinj Maaron aliinja. ⁹⁻¹⁰ Ve ighamu le irau kat pa ghamuunj uraat to watoonjrau. Tauta Maaron isaav pani ighe i ighuru imin daaba to watoonjrau imin Melkizedek. Tauvene yes tau tiloonj aliinja ve titaghoni, i pale igham mulin zi, ve tisov tileep matazi yaryaare le alok. *

Ngar toit imin yes geegeu sov

¹¹ Lemai saveenj naol tau nighe nasavia pa Yesu ve uraat tooni. Eemon isaav ighe nila saveenj tane loolo, ene pale ipatajan payam. Pasaa, saveenj tau yam alonjloona na, ngar tsiam ivot pani rekrekia mako. ¹² Aghita. Yam agham Maaron saveenj tooni alok wa. Tauvene naghe pa yam aat apaghazonjai tamtamon siriv pani wa. Eemon mako. Yam amin yes tau paghpaghuzi pa ghamuunj Maaron aliinja. Yam amin geegeu tau tighunghun tuz soone. Irau aghan aniij ariaanja mako. *

¹³ Tamtamon tau tighunghun tuz mon, ene ngar toozi imin yes geegeu. Pasaa, ngar tau iduduunj ila Maaron maata na, tighazonj pani soone. ¹⁴ Ve aniij ariaanja, ene to yes tau ngar toozi imatuugh wa. Zeran tauvene, mos to Maaron ipaghazonjai zi gha ngar toozi ivot wa. Tauta yes irau tighilaal ngar sindei ta poia, ve sindei ta saghati. *

6

¹⁻² Saawe tau taloonj saveenj to Krisi imin paaghu, tipaghazonjai ghiit pa ngar raurauai imin maata. Ngar tauvene: Ngar tau pale igham ghiit tamaat gha talaleen na, iit aat tapuli

* **5:9-10:** Hib 2:10, 17, 5:6, 7:1+ * **5:12:** 1Kor 3:1+ * **5:14:** Ro 16:19; Ep 4:14; Pil 1:10

ileple, ve tatoro n̄gar toit, ve taghur ila to Krisi. Ve tipaghazon̄ai ghiit pa n̄gar maata maata to ghamuun̄ yaa,*
 ve n̄gar to ghuruun̄ nimaan izala tamtamon pavozi imin palotiin̄ zi, ve burigiin̄ to yes mateegha. Ve tipaghazon̄ai ghiit tighhe Maaron pale igabiiz ghiit ve ighur atuya pait. Atuya tawe pale igheen le alok. N̄gar tauvene ta tipaghazon̄ai ghiit pani imin maata, ra tisavia n̄gar siriv. Ene poia. Eemon ighe tasasavia n̄gar tauvene mon, ene imin iit taghelia rir mon, ve tarau ruum anoon̄a mako. Tauvene iit aat tazuari ghiit le taghazon̄ pa n̄gar siriv paam, leso n̄gar toit imatuugh pa Maaron saveen̄ tooni.³ Ve isaav ighe Maaron iyok pait, ene aat tagham tauvene.

Yes tau tighur murizi pa Krisi na, lezi eez muul mako

⁴Aghita. Isaav ighe tamtamon eta ipul muuri pa Krisi, ene pale iit leen eez eta to taghamu itoor n̄gar tooni imuul ila pa Krisi ne mako. Tamtamon siriv, Maaron ipaghazon̄ai zi gha n̄gar toozi ighazon̄ wa. Ve Maaron Avuvu igham uratoi zi, ve poia tooni tau sambam ve izilam na, yes tiyamaana wa.⁵ Ve tigham saveen̄ to Maaron gha tiyamaana tighhe poia. Ve Maaron tapiri maata maata tau

* **6:1-2:** Muun̄, tamtamon tigham yaa pa puughu naol. Isaav ighe tamtamon eta tau Yuda mako na, ighe itoor n̄gar tooni ve itaghon yes Yuda pa sun̄uun̄ toozi, i aat igham yaa. Ve isaav ighe tamtamon eta ighe itaghon n̄gar to n̄eer rughuzaan̄a Yoan, ene i paam igham yaa. Yes Yuda timinmin nimazi ve titaghon eez maata maata pa ririwaan̄, leso tin̄galaan̄ ila Maaron maata. Ve Krisi tamtamon tooni tigham yaa, leso tipaak Krisi pa mateegh tooni ve yes̄a Krisi tivalupu zi timin eemon.

murei pale ivot ighazoonj kat, yes tiyamaana wa.
*

⁶ Tamtamon tauvene, ighe tighur murizi pa Krisi, ene lezi eez to titoor ngar toozi ve timuul tila tooni ne mako. Pasaa, ngar tau tighamu na, ene imin tirav Maaron Naatu izala ai pambaroonj muul, ve tipamayanjini ila eval tiina matazi. *

⁷ Taan tau uman izizi pani ve aniinj popoia titumtum ila, ene iuul yes tau tighanghan ila taan tana. Taan tauvene, poia to Maaron aat igheen ila.

⁸ Eemon taan tau oot sasaghati tomania waar tuatua mon titumtum ila, ene taan poia mako. Taan tauvene aat iyamaan ghi. Pa ighe ighengheen tauvene taghon gha ila, ene pale malau mako, ve Maaron ivaghamunia, ve yav ighani. *

⁹ Yam zeran tsiei, lolomai igheen tsiam kat. Onoon, saveenj tau aazne nisavia payam ne, ari-aaņa rig. Eemon yei nighur ila ariiaanj nighe yam amin taan saghati mako. Yam amin taan poia. Tauvene Maaron pale igham mulin gham ve aleep poia. ¹⁰ Pasaa, i itataghon ngar duduunja mon. Irau igham ngar saghati eta mako. Tauvene i irau loolo iveegh pa uraat tsiam popoia ve uleenj tau yam aghamgham pa tamtamon tooni ne mako. Aazne paam, yam auluul zi. Ngar tana itotoi ighe lolomim igheen tooni kat. *

¹¹ Yei nighe yam asov azuari gham le ataghon dudunjai ngar to Krisi. Tauvene lolomim ruru sov. Akis ghuruunj ila tsiam tunja le irau agham lepoogh poia tau aghurghur matamim pani na.

* **6:5:** Mbo 34:8 * **6:6:** Hib 10:26+; 2Pe 2:20+; 1Yo 5:16 * **6:8:** Mt 3:10, 7:19; Lu 13:6+ * **6:10:** Mt 10:40, 25:40; 1Kor 15:58

¹² Tauvene arogroog matamim sov. Matamim iyaryaar, ve ataghon ngar to yes tau tighur ila to Maaron, tiyooz ariaan pa badoon patanani, ve tisaanan le tighita saveen mbuaan tooni anoonja.
*

Loloon ruru pa saveen mbuaan to Maaron sov

¹³ Saawe tau Maaron imbu saveen tomania Abaram, i iwaat tauu eeza pa saveen mbuaan tooni to ipariaanja. Pasaa, tamtamon eta eeza iliiv Maaron mako. Tauta iwaat tauu eeza pa saveen tawe, lesa ipariaanja le iyaryaan kat. ¹⁴ Ighe:

“Onoon kat. Yau taug aat naghur poia tsiau tiina izaa tsio, ve naghama paaghu tsio timasa timin naol.” *

¹⁵ Abaram ighur ila saveen mbuaan tane. Tauta aate izi, ve isaanan ila le ighita anoonja.

¹⁶ Iit tamtamon gabuaan tauvene: Isaav igha itina zeran siriv tavazorai ghiit pa gabua eta, ene aat tawaat tamtamon eta tau eeza tiina iliiv ghiit. Lesa eeza tawe ipariaan saveen toit, ve ipoon zeran tana avozi. *

¹⁷ Maaron tauvene paam. Ngar tooni iyaryaan kat igha igham poghania Abaram tomania paaghu tooni. Irau itoor ngar tooni muul mako. Tauta iwaat tauu eeza pa saveen mbuaan tooni, ve ipariaanja le iyaryaan kat. Lesa iit tamtamon tau ezaan pa gabua tau i imbu saveen pani na, loloon ruru pani sov. ¹⁸ Tauvene iit tau tayoong ila to Maaron na, leen gabua ru tau tipariaan ghiit to taghur ila tooni. Ee, ene saveen mbuaan tooni. Ve ite, ene

* **6:12:** Hib 10:36, 12:1; Yems 1:3+ * **6:14:** Gnp 22:16+ * **6:16:** Igham 22:10+

i tauu eeza tau iwaato to ipariaan saveen tooni. Gabua ru tane, Maaron irau itoor ngar tooni, ma itombaan ghiit pani ne mako. Gabua ru tane tipariaan ghiit kat, lesu takis ghuruun ila toit tunja, ve taghur mataan pa lepoogh poia tau Maaron pale igham pait. *

¹⁹⁻²⁰ Lepoogh poia tau taghurghur mataan pani ne, ene ikis ghiit tunja, imin padewaan tau ikis waan. Pasaa, Neer tau imin eez pait to tagham lepoogh tana, i imuun pait, ve ilon ila rumei to nugh sambam wa. Ene Krisi. Ve uuli tau ipoon rumei loolo tau patabuyaan le patabuyaan kat na, i ila iliv pani, le ila peria to Maaron. Pasaa, Krisi, i imin daaba tauu to watoonrau raraate imin Melkizedek. Tauvene i pale iyooz bodbodaan pa Maaron ve iit tamtamon, ve uraat tooni tawe iseenja taghon taghon gha ila. *

7

Melkizedek, i kinik ve neer to watoonrau

¹ Melkizedek tau nasavia ne, i kinik to nugh Salem, *

ve i neer to watoonrau tau ibesbees pa Maaron Tina Tau Iliiv Zimaronja Tisov. Saawe tau Abaram yesna kinik siriv tigham malmal le iliiv zi, i imuul ila le izaan to Melkizedek izi eeze. Ra Melkizedek ighur poia to Maaron izaan tooni. *

² Mako Abaram iburig gha ilup gabua isov tau tila tigham malmal ve tiyau zi tilam na, ve ivalagh

* **6:18:** Tit 1:2 * **6:19-20:** Mbo 110:4; Hib 4:14, 5:6, 9:24 * **7:1:** Yerusalem eeza ite, ene Salem (Mbo 76:2). * **7:1:** Gnp 14:17+

zi timin ngun sanjavul, ve igham ngun ee ila pa Melkizedek.

Aiyo, Melkizedek eeza puughu tauvene: ‘Kinik to ngar duduunja.’ Ve i ingin nugh Salem. Ve Salem puughu, ene ‘ngar luuma.’ Tauvene i kinik to ngar duduunja ve ngar luuma. ³ Ve gabua ite. Igha tawaat Maaron aliinja, ene taghita saveenji ziiri eta tau isavia Melkizedek taama gha tiina ve puughu tooni mako. Ve saawe tau tiina ipoopa, ve saawe tau i imaat na paam, tibood saveenja eta mako. Tauvene taghita taghe i imin ilaal poia ee pa Maaron Naatu. Pasaa, i neer to watoonrau tau iyooz bodbodaan pa Maaron ve iit tamtamon irau saawe. *

⁴ Aghita. Ngar tau timbuun Abaram igham pa Melkizedek na, ene itotoi ighe Melkizedek, i eeza tiina kat. Pasaa, gabua tau tila tigham malmal ve tiyau zi na, Abaram ivalagh zi imin ngun sanjavul, ve igham ngun ee tau poia kat ila pa Melkizedek.

⁵ Aiyo, tagham ngar pa tutuunji tau murei Maaron igham pa yes Israela na. Levi paaghu tooni tau timin zeran to watoonrau na, ve eval tiina to Israel, yes tonvetaz. Pasaa, tisov tivot ila to Abaram. Eemon tutuunji to Mose isaav tauvene: Eval tiina to Israel aat tivalagh gabua toozi imin ngun sanjavul, ve tighur ngun ee ila pa yes tau Levi paaghu tooni. *

⁶ Melkizedek, i ivot ila to Levi mako. Eemon gabua tau Abaram iyau zi na, tauta ivalagh zi imin ngun sanjavul, ve igham ngun ee ila pa Melkizedek. Aghita. Abaram eeza tiina kat. Pasaa, Maaron imbu saveenji tomania pa gabua naol. Eemon

* 7:3: Mbo 110:4 * 7:5: Nam 18:21

Melkizedek eeza tiina iliiv Abaram. Tauta ipaloti, ve ighur poia to Maaron iza a tooni. ⁷ Iit tasov tawatagh: Neer tau igham palotiin pa tamtamon, ene i eeza iliiv yes tau tigham palotiin ila tooni na. ⁸ Ve gabua ite paam. Onoon, paitoon tau tamtamon tighurghur zi ila pa Maaron na, ene Levi paaghu tooni ta tiyauyau gabua tawe imin lezi. Eemon yes tikis uraat toozi irau saawe mako. Tighamgham uraat ila, le saawe tau ighe timaat, mako tamtamon paghpaaghu tiyol zi. Eemon Melkizedek tau Abaram igham gabua siriv pani na, tibood saveen eta pa mateegh tooni mako. Tauvene i imin ilaal pa Neer tau ileep maata yaryaare le alok. *

⁹⁻¹⁰ Ve iit irau tasaav taghe: Saawe tau Melkizedek iza a to Abaram, ve Abaram ivalagh gabua tooni ve igham sirivu ila pani, ene Levi tomania paaghu tooni nimazi igheen ila gabua tana paam. Onoon saawe tana, tipoop Levi soone. Eemon murei, i ivot ila to Abaram paaghu tooni.

Yesu, i neer to watoonrau imin Melkizedek

¹¹ Muun, yes Israela tigham tutuun to Maaron, ve tileep ila tutuun tawe saamba. Tutuun tana isaav tauvene: Levi paaghu tooni mon ta Maaron ighur zi pa uraat to watoonrau. Laak, isaav ighe uraat toozi to watoonrau igharaat tamtamon le tingalaan kat ila Maaron maata, mindai ta Maaron isaav ighe murei, neer ite to watoonrau pale ivot ve igham uraat imin Melkizedek? Neer tawe, uraat tooni raraate imin Aron tomania paaghu tooni mako. *

* **7:8:** Hib 5:6, 6:20 * **7:11:** Hib 8:7

¹² Eemon isaav ighe Maaron ighur uraat to watoonrau ila tamtamon ite niima, ene itotoi ighe i itoor tutuun tooni wa. *

¹³ Njeer to watoonrau tau nisasavia ne, ene Tiina toit Yesu. I ivot ila to Levi mako. I ivot ila to Yakop naatu Yuda. Ve iit tawatagh: Muun ve ilam, paaghu eta to Yuda ikis uraat to watoonrau mako. ¹⁴ Pasaa, saawe tau Mose ighur tamtamon to tigham uratoi watoonrau, i isavia aliinja eta injarui Yuda paaghu tooni mako. *

Maaron iyol eez munngaana to tutuun pa eez paaghu

¹⁵ Saveen tau nisasavia ne, ngar tsiam aat ighamu wa. Aazne, njeer paaghu ee to watoonrau ivot wa. I raraate imin Melkizedek. ¹⁶ Tutuun to Mose isaav tauvene: Yes tau sin to Levi mon, o timin zeran to watoonrau. Eemon Yesu imin njeer to watoonrau itaghon eez tawe mako. I imin njeer to watoonrau pasaa, i tapiri tiina kat, ve ileep maata yaryaare le alok. Irau imaat muul mako. ¹⁷ Pasaa, Maaron aliinja isavia ighe:

“Yo njeer to watoonrau imin Melkizedek. Ve yo aat uleep tauvene taghon taghon gha ila.” *

¹⁸⁻¹⁹ Tutuun munngaana, le tapiri irau to iuul tamtamon mako, ve irau igham gabua eta ivot iduduun kat ne mako. Tauta Maaron iyoli pa eez paaghu tau poia kat le iliiv eez munngaana. [Eez

* **7:12:** Ro 10:4; Ga 3:24+; Hib 8:13

* **7:14:** Mt 1:1; Syg 5:5

* **7:17:** Mbo 110:4; Hib 5:6

tawe, ene Yesu tauu.] I igham ghiit tala tagharau Maaron kat. Leso tagham lepoogh poia tau taghurghur mataan pani na. *

²⁰ Saawe tau Maaron ighur Yesu imin ñeer to watoonrau, i imbu saveen pani, ve ipariaan saveen tawe le iyaryaan kat. Eemon Levi paaghu tooni, Maaron igham ñgar tauvene pa toozi eta mako.

²¹ Aghita. Maaron imbu saveen ariaana kat pani. Pasaa, isaav pani ighe:

“Ñeer Tiina, i imbu saveen tomani ghom, ve ipariaana le iyaryaan kat. Irau itoor ñgar tooni muul mako. Yo ñeer to watoonrau, ve uraat tsio tana irau isov mako. Pale ighengheen tauvene, taghon taghon gha ila.” *

²² Tauvene eez paaghu tau aazne tataghoni gha leso itinja Maaron tavalupu ghiit tamin eemon, i le saveen mbuaan tau poia kat. Iliiv saveen tau muun Maaron imbua tomania yes Israela na. Ve Yesu ta iyooz pa saveen mbuaan paaghu tana ve igham uratoini, leso anoonja ivot. *

Yesu, i ñeer to watoonrau tau irau igham mulin ghiit

²³ Muun, yes Israela lezi zeran katini to watoonrau. Tikis uraat toozi irau saawe mako. Pasaa, tighamgham uraat ila, le saawe tau ighe timaat, mako tamtamon paaghu tiyol zi. ²⁴ Eemon uraat to Yesu, ene irau isov mako. Pasaa, i ñeer to watoonrau tau ileep irau saawe. ²⁵ Tauvene yes tau tinjarui Maaron ila i eeza na, i irau igham mulin zi.

* **7:18-19:** Ro 8:3, 10:4; Ep 2:18; Hib 8:13 * **7:21:** Mbo 110:4

* **7:22:** Hib 8:6, 12:24

Pasaa, i igham naghoon ve ileep igharau Maaron irau saawe, lesu isun Maaron pa uleen ghiit. *

²⁶ Poia pa iit leen neer to watoonrau tauvene. I irau iuul ghiit. Pasaa, i imin iit tamtamon sasaghatiin to taan mako. I le sosor eta mako. I patabuyaaj, ve ngar tooni isov, ene ingalaaj mon. Taama Maaron ighamu izala nugh sambam, ve aazne eeza iliiv gabua ta naol ne. *

²⁷ Tauvene i imin daaba siriv to watoonrau mako. Pasaa yes tawe, saawe isov tighamgham watoonrau pa rewaan sosor to tauzi imin maata. Mako tigham watoonrau pa sosor to tamtamon siriv. Eemon Yesu, i le sosor eta to igham watoonrau pani ne mako. Ve gabua ite paam. Watoonrau tau i igham pa rewaan sosor to iit tamtamon, i ighamu pai eemon, ve isov. Watoonrau tawe, i ighamu indeej saawe tau iyoki tauu gha imaat. *

²⁸ Tamtamon tisov tau tighur zi timin daaba to watoonrau itaghon tutuun to Mose na, tapirizi imbolmbool. Pasaa, yes to taan. Tauta Maaron igham tutuun pa yes Israela, ve murei ra, ighur tauu Naatu imin neer to watoonrau. I imin zeran siriv to watoonrau mako. Pasaa, Maaron imbu saveej pani, ve ipariaaja le iyaryaja kat. Ve ngar isov tau Naatu tawe itaghooni, tauta ighamu gha irau kat pa uraat tooni. Ve i pale ileep tauvene taghon taghon gha ila. *

* **7:25:** Ro 8:34; 1Yo 2:1

* **7:26:** 2Kor 5:21; Hib 4:14+

* **7:27:**

Hib 5:3, 9:12; 1Pe 3:18

* **7:28:** Hib 2:10, 5:8, 7:24

8

Krisi ileep ila Maaron naagho izi sambam ve ighamgham uraat tooni

¹ Saveeṅ tau nisavsavia ne, puughu tauvene: Aazne, iit leen daaba poia ee to watoonṅrau. I ileep ila Maaron saksaki niima tapir igharau niia to ghamuunṅ pooz ta sambam we. *

² I ileep ilonṅ ila balbaal patabuyaṅ tau igheen sambam we, ve ighamgham uraat tooni to watoonṅrau ila loolo tau patabuyaṅ le patabuyaṅ kat. Balbaal tawe, ene balbaal tauu. Tamtamon to taan tipayooze mako. Maaron tauu ipayooze. *

³ Daaba tisov to watoonṅrau, tighur zi lesu tigham paitoonṅ to tamtamon ila pa Maaron, ve tigham uratoi watoonṅrau toozi. Daaba to watoonṅrau toit tauvene paam. Irau niima ṅginaaṅa ve ila to Maaron ne mako. I aat ikis gabua eta, ve ila tomania, lesu igham pani imin watoonṅrau. *

⁴ Isaavighe Yesu ilepleep izi taan, ene i irau imin ṅeer to watoonṅrau mako. Pasaa, watoonṅrau maata maata tau tutuunṅ to Mose isavi zi na, tamtamona tileep pataghaṅ wa to tigham uratoi zi. ⁵ Eemon yes tibesbees pa Maaron ilonṅ ila balbaal to taan mon. Balbaal tawe, gabua tauu mako. Ene balbaal tau igheen izi sambam we anunu mon. Pasaa,

* **8:1:** Mk 16:19; Ep 1:20; Hib 1:3 * **8:2:** Saawe tau yes Israela tileep izi loloz Sinai puughu, tigharaat balbaal ee imin niazi to suṅuunṅ. Saveeṅa igheen ila Maaron Igham Mulin, Yes Israela ṅgat 25 ila 31 ve ṅgat 36 ila 40. Ziiri tane, isavia balbaal tauu tau igheen izi sambam. * **8:2:** Igham 25:1–30:38, 36:1–40:38; Hib 9:11, 24 * **8:3:** Hib 5:1, 9:12

saawe tau Mose ighe ipayooz balbaal patabuyaanj to Maaron izi nugh nginaanja, Maaron isaav ariaanj pani ighe: “Balbaal anunu tau natotoia payo izi loloz na, matam kisini ve ugharaat gabua naol isov itaghoni.” *

⁶ Ve aazne, uraat to watoonraurau tau Maaron ighuru ila Yesu niima, ene poia kat iliiv uraat to watoonraurau ta muun. Ve eez paaghu to itinja Maaron tavalupu ghiit tamin eemon, tauvene paam. Poia kat iliiv eez munjaana, ve le saveenj mbuaanj popoiazi kat. Eez paaghu tana, ene ivot ila uraat to Krisi. Pa i ta iyooz bodbodaanj pa Maaron ve iit tamtamon. *

⁷ Imin ta eez munjaana tawe poia kat, ve le patajani eta mako, kananj iraurau Maaron iyoli pa eez paaghu tane mako. *

⁸ Eemon Maaron ighita monmon tamtamon tooni tisosor pa eez tooni. Tauta isaav ighe:

“Aloon. Saawe eta pale ivot, mako yau naghur eez paaghu pa yes Israela ve yes Yuda, † leso yeja nivalupu ghei nimin eemon. *

⁹ Eez paaghu tane, pale ite pa eez tau naghuru pa timbuzja na. Muun, saawe tau nakis Israel nimazi ve nagherv zi gha tipul Isip, yau navotia eez munjaana tawe pazi.

* **8:5:** Igham 40:1+; Mbanj 7:44; Kol 2:17; Hib 10:1 * **8:6:** 2Kor 3:6+; Hib 7:22 * **8:7:** Hib 7:11, 18, 10:1 † **8:8:** Saawe tau Kinik Solomon naatu Reoboam injin yes Israela, yes tivalagh zi timin ru. Yes tau tileep ila pa kaagu na, tiwaat zi Israela. Ve yes ta tileep ila pa daudau na, tiwaat zi Yuda. Eemon murei tilup zi muul. Tauta saawe to Yesu, tiwaat zi tighe ‘Israel’ ve ‘Yuda’. * **8:8:** Yer 31:31+

Eemon titaghon dudunaini mako. Tauta naghur murig pazi.

¹⁰ Eez paaghu tau pale naghuru pazi, ene vene: Murei, yau taug pale naghur tutuun tsiiau igheen ariaan ila ngar toozi, ve naboode ila lolozu paam. Ve yau pale namin Maaron toozi, ve yes timin tamtamon tsiiau.
*

¹¹ Saawe tana ighe ivot, tamtamon eta irau ipaduduun zeetja pa saveen tsiiau muul mako.

Ve tamtamon eta irau isaav pa tonvetaz tooni ighe: ‘Oyai, yam awatagh Maaron, o poi!’ vene mako. Pasaa, yes tisov pale tiwatagh katin ghau. Yes tau lezi ezazi mako, ve yes tau ezazi tintiina na paam.
*

¹² Ve yau pale lolog isaghatin zi, ve nareu sosor toozi isov ilale, ve matag ingali muul mako.”
*

¹³ Aghita. Isaav ighe Maaron isavia eez paaghu eta, ene itotoi ighe eez tau ivot imin maata na, ene munjinaan ve igharau ighe isov. Eez tauvene, malau mako pale ilale kat.
*

9

Eez munjaana, irau igham ghiit tala tagharau Maaron mako

* **8:10:** Ezek 36:25+; 2Kor 3:3; Hib 10:16 * **8:11:** Is 54:13; Yo 6:45
* **8:12:** Ro 11:27; Hib 10:17 * **8:13:** Ro 10:4; Hib 7:18

¹ Eez tau ivot imin maata na, ene le tutuun naol tau isavia sunjuun ngara. Ve eez tawe isavia balbaal patabuyaaj tau igheen izi taan. *

²⁻³ Balbaal tawe, tipayooze le isov, ra tidaad uuli tiina ila loolo, leso tirav motin loolo imin ru. Loolo ee, ene tiwaato tighe ‘nugh patabuyaaj’, ve gabua ru tigheen ila loolo. Ee, ene lam aia tau tighurghur lam izala. Ve ite, ene boor tau tighurghur mberet patabuyaaj izala na. Ve balbaal loolo ite tau uuli tiina tawe ipoona, ene tiwaato tighe ‘nugh tau patabuyaaj le patabuyaaj kat.’ ⁴ Loolo tawe, artaal to tunuun naunaun vaazi popoia igheen ilon ila. Artaal tawe, tigharaata pa gol. Ve Bokis to Saveej Mbuaaj igheen ilon ila paam. Bokis tawe, tipaak gol ila loolo ve muuri, ve tighur gabua siriv ilon ila. Ee, ene uur tau tigharaata pa gol ve tighur aniin manna siriv igheen ilon ila. Ve gabua ite, ene titi to Aron tau isalun. Ve gabua ite, ene maet babaaja ru tau tutuun sanjavul igheen ila. Tutuun tawe, ene isavia eez to yes Israela titaghoni leso lupuun toozi tomania Maaron igheen poi. *

⁵ Ve tighur anela anunuzi ru izala bokis tana paavo ve bagezi ipoon aavo. Gabua ru tawe timin ilaal pa Maaron mbonari ve tapiri. Bokis tana aavo, ene tiwaato tighe ‘nugh to rewaan sosor.’ Eemon aazne, irau nila saveej tane loolo mako.

⁶ Tigharatoor gabua naol tana, ve tipayooz zi le isov, ra zeran to watoonrau tipaburigin uraat toozi. Saawe isov, tilonlon tila balbaal patabuyaaj loolo tau igheen potla na, ve tighamgham uraat toozi. ⁷ Ve daaba toozi zigani mon ta irau ilon ila

* **9:1:** Igham 25:31, 40 * **9:4:** Igham 16:33

balbaal loolo tau patabuyaanj le patabuyaanj kat. Eemon i ilonj ila pai eemon pa ndaman enjaenja. Ve irau niima nginaanja ve ilonj ila mako. I aat ikis gabua eta siinji, o ilonj ila. Saawe tau ilonj ila, i igham watoonjrau pa tauu sosor tooni imin maata. Mako igham pa yes tau tikankaan, ve tigham sosor. *

⁸ Ngar tau tighamghamu ilonj ila balbaal tana, ene Avuvu Patabuyaanj ipaghazonjai ngara pait tau-vene: Saawe tau balbaal tana iyozyooz, eez to talonj tala nugh patabuyaanj ve tagharau Maaron, ene ivot ighazonj soone. ⁹ Ve balbaal tana, ene itotoi ngar tau ivotvot pa saawe tane ighe: Yes tau tighurghur paitoonj ve watoonjrau toozi ila pa Maaron itaghon eez munngaana na, ngar toozi tawe irau igham zi tiyamaan tigde tingalaanj kat ila Maaron maata ne mako. *

¹⁰ Pasaa, watoonjrau tauvene, tomania tutuunj maata maata tau tisavia saa gabua tau irau taghani ma taghunu, ve eez maata maata to riri-waanj leso tanjalaanj ila Maaron maata, ene gabua to uliin mon. Irau igharaat loloon le ingalaanj kat ila Maaron maata ne mako. Tauta Maaron ighur eez tana ighe igheen le tazaa pa saawe tau i ipaduduunj gabua ve igham eez paaghu ivot, mako tapuli. *

Krisi sinj tooni, ene imin eez paaghu to itiija Maaron tavalupu ghiit

¹¹ Ve aazne, eez paaghu tana ivot ighazonj pasaa, Krisi, i ilam wa. I daaba to watoonjrau tau

* **9:7:** Wkp 16:2-34 * **9:9:** Hib 10:1+ * **9:10:** Ro 10:4; Ga 3:24+; Kol 2:16+

imin eez pait gha taghamgham gabua popoia ila to Maaron.*

Pasaa, i ilonj ila balbaal tauu tau igheen izi sambam, ve ila peria to Maaron. Balbaal tawe, poia le poia kat. Iliiv balbaal tau muunj yes Israela tirao na. Pasaa, tamtamon tirao pa nimazi mako, ve igheen izi taan mako. Igheen ta sambam we.*

¹² Saawe tau Krisi ilonj ila balbaal loolo tau patabuyaanj le patabuyaanj kat na, i ila tomania sij to mekmek, ma makau naatu eta mako. I ila tomania tauu sij tooni tau imalinj imin watoonjrau na, ve ila ivot to Maaron. Tauta ireu sosor toit, ve igham mulin ghiit. Leso saghati tapiri ikis ghiit muul sov, ve taleep mataan yaryaare le alok. Uraat tana, Krisi ighamu pai eemon, ve isov. Irau ighamu muul mako.*

¹³ Aghita. Muunj, isaav ighe gabua eta igham tamtamon tisaghat ila Maaron maata, ene titir sij to mekmek, ma makau tamoot eta, ma avav to makau livaa tau yav ighani na izala pavozi. Leso igham tinizi to potla injalaanj, ve irau tisuñ pa

* **9:11:** Gabua popoia tane, ene vene: Krisi igham ghiit tanjalaanj kat ila Maaron maata, tauvene iit irau tagharau Maaron. Ve taghita saveenj mbuaanj to Maaron anoonja, ve ezaan pa ghamuunj lepoogh poia tomania Maaron izi nugh sambam. * **9:11:** Hib 4:14, 8:1+

* **9:12:** Hib 7:27, 10:10+; 1Pe 1:19

Maaron muul. † *

¹⁴ Ighe tauvene, Krisi sinj tooni iliiv kat pa gabua tawe. Pasaa, Avuvu Patabuyaanj tau ilepleep irau saawe na, tapiri ipaloti, ve iyoki tauu gha imaat imin watoonraun pa Maaron lesu ireu sosor toit. Watoonraun tooni tawe, poia le poia kat. Sosor eta ipaako mako. Tauvene sinj tooni le tapiri tiina. Irau imin loloon ve tayamaan taghe tangaalaanj kat ila Maaron maata. Ve tapul ngar tau ighegherev ghiit pa mateegh na, lesu tabees poi pa Maaron maata yaryaare. † *

¹⁵ Tauvene Krisi, i neer tau iyooz bodbodaanj pa iit tamtamon ve Maaron, ve igharaat eez paaghu pait, lesu itinja Maaron tavalupu ghiit tamin eemon. Pasaa, yes tau timalaanj pa tutuun to eez munngaana na, mateegh tooni ipasov sosor toozi atuya, ve igham mulin zi. Lesu tamtamon tisov tau Maaron ipoi zi timin le na tigham lepoogh poia itaghon saveenj mbuaanj tooni. Lepoogh tawe pale iseenga taghon taghon gha ila. *

† **9:13:** Yes Yuda tigham ngar tauvene: Isaav ighe tikis mateegh eta, ma tighan gabua siriv, ma kolekole igham zi, ma kaiyo ingun zilivaa, ene igham zi tisaghat ila Maaron maata. Tauvene yes aat tigham watoonraun, ma ngar siriv, lesu tigharaat tauzi ve tinizi to potla ingalaanj ila Maaron maata muul. Saveenja igheen ila Wok Pris 11:1, 12:1, 13:1+. Ndaman isov, saawe tiina to rewaan sosor ighe ivot, ene daaba to watoonraun itir sinj to mekmek ve makau naatu izala yes Yuda pavozi. Lesu igham tamtamon tisov tangaalaanj ila Maaron maata muul. Ughita Wkp 16:1+. * **9:13:** Nam 19:2-22

† **9:14:** Eez ite to tator saveenj tau ipasov ziiri tane, ene vene: 'igham ghiit tapul ngar naol to sunjuun tau iuul ghiit mako na, ve tabees poi pa Maaron maata yaryaare'. * **9:14:** Tit 2:14; Hib 10:22; 1Yo 1:7 * **9:15:** Lu 22:20; Ro 3:25+; 1Tim 2:5

Krisi siŋ tooni ipariaaŋ saveeŋ mbuaaŋ paaghu to Maaron

¹⁶⁻¹⁷ Iit tawatagh: Isaav ighe tamtamon timbu saveeŋ, yes aat tirav gabua eta imaat imin watoonrau. Leso tipariaaŋ saveeŋ mbuaaŋ toozi. Ve isaav ighe tirav gabua eta imaat to tipariaaŋ saveeŋ mbuaaŋ toozi mako, ene pale saveeŋ mbuaaŋ toozi iyaryaaŋ mako. § *

¹⁸ Tauta saawe tau Maaron imbu saveeŋ tomania yes Israela izi loloz Sinai to tivalupu zi timin eemon na, siŋ to ŋgai imaliŋ. ¹⁹⁻²⁰ Saawe tana, Mose iwaat tutuuŋ to Maaron pa yes Israela le isov, ra igham siŋ to makau ve mekmek, ve itoora tomania yaa. Ve igham sipsip ooro siŋsiŋai gha ikauu ila ai isop booga, ve izeeva izila siŋ tawe. Ra itiri izala rau tau tutuuŋ to Maaron ighen ila na, ve itiri izala Israela tisov pavozi paam, ve isaav pazi ighe:

“Eez to ataghoni lesu yamŋa Maaron avalupu gham amin eemon, tauta i isavia payam gha alooŋa wa. Ve yam ambu saveeŋ pani aghe ataghoni. Siŋ tane, ene to ipariaaŋ saveeŋ tau aazne yam ambua tomania Maaron.” *

²¹ Ve Mose itaghon ŋgar eemon pa balbaal

§ **9:16-17:** Eez ite to tator ziiri ru tane ene vene: “Isaav ighe ŋeer eta maata ingal igham ŋgar pa mateegh tooni ve ighe irei gabua tooni, i aat isaav ghazoŋa: murei, sei pale igham saa gabua. Ene imin saveeŋ mbuaaŋ tooni. Saveeŋ tawe pale iyooz tauvene le saawe tau i imaat, mako tirei gabua tooni itaghon saveeŋ tana. Ve isaav ighe i ilepleep maata yaryaare soone, ene irau titaghon saveeŋ tana mako. Saveeŋ tana aat iyozyooz le irau ŋeer tana imaat, o anooŋa tooni ivot.” * **9:16-17:** Gnp 15:9+; Mt 26:28

* **9:19-20:** Igham 24:8

patabuyaany to Maaron tomania saveeny mariy to sunjuuny tau tigheen ila loolo na paam. Igham sinj ve itiri izala pavozi. ²² Pasaa, saveeny tau igheen ila tutuuny to Mose na, isaav tauvene: Ighe sinj imalinj, ene irau igham gabua isov tingalaany ila Maaron maata. Gabua enjaenja mon ta mako. Ve ighe sinj imalinj mako, ene irau Maaron ireu sosor mako. *

Krisi igham watoonrau pai eemon, ve isov

²³ Balbaal patabuyaany tau yes Israela tirao, tomania saveeny mariy tau tigheen ila loolo na, ene gabua tauu mako. Ene gabua tau tigheen izi sambam na anunuzi mon. Tauta tiravrav ngai maata maata imin watoonrau, lesu sinj to gabua tawe igham balbaal tomania saveeny mariy tau tigheen ila loolo na tingalaany ila Maaron maata. Eemon gabua tauu, ene tighenaar izi sambam. Tauta ngar tauvene irau igham zi tingalaany mako. Lezi watoonrau tau poia kat le iliiv sinj to ngai, o igham zi tingalaany ila Maaron maata. *

²⁴ Puughu tane ta Krisi ilonj ila balbaal patabuyaany to taan tau tamtamon tigharaata pa nimazi ne mako. Pasaa, balbaal tawe, ene balbaal tauu mako. Ene balbaal tau igheen izi sambam we anunu mon. I igham nagoon, ve ilonj ila nugh sambam duduuny. Tauta aazne, ileep ila Taama Maaron naagho, ve iuluul ghiit. *

²⁵ Yes Yuda, ndaman isov, daaba to watoonrau ilonjonj ila balbaal loolo tau patabuyaany le patabuyaany kat. Ve saawe tau ilonj ila, i ila

* **9:22:** Wkp 17:11; Ep 1:7 * **9:23:** Hib 8:5 * **9:24:** Ro 8:34;
Hib 4:14, 8:1; 1Yo 2:1

tomania tauu siŋ tooni mako. I ilala tomania siŋ to ŋgai. Eemon Kriŋi, i igham watoonrau pai katini mako. Iyoki tauu gha imaat pai eemon, ve isov. ²⁶ Ve imin ta i itaghon ŋgar tau daaba to watoonrau to taan titaghoni, kanaŋ saawe tau Maaron ighur sambam tomania taan ve ilam, i inoknok ghamuun yavyavuun ve mateegh. Eemon mako. Aazne ene saawe to Maaron ipasov uraat tooni. Tauta Kriŋi izilam taan, ve iyoki tauu gha imaat. Leso ireu sosor toit, ve ipasov saghati tapiri. Ve uraat tana, i ighamu pai eemon ve isov. Irau ighamu muul mako. *

²⁷ Tamtamon tisov aat timaat pai eemon ve isov, itaghon Maaron ŋgar tooni. Ve murei, gabizoon toozi pale ivot ve tigham atuya toozi. *

²⁸ Kriŋi tauvene paam. I iyoki tauu gha imaat imin watoonrau pai eemon, ve isov. I ibaad pataŋani tina, lesu ireu sosor to tamtamon katini. Ve murei, i pale imuul izilam. Saawe tana, i irau igham uraat muul pa rewaan sosor to tamtamon mako. I ilam to igham mulin yes tau tighurghur matazi pani ve tisananani. *

10

Mateegh to Kriŋi, ene watoonrau tauu

¹ Watoonrau tau tigham zi itaghon tutuun to Mose na, ene gabua tauu mako. Ene imin gabua popoia tau murei tivot na anunuzi mon. Aghita. Ndaman isov, zeran to watoonrau tino-knok ravuun ŋgai pa rewaan sosor to tamtamon.

* **9:26:** Hib 7:27; 1Pe 3:18 * **9:27:** Gnp 3:19; 2Kor 5:10; Syg

20:11+ * **9:28:** Mt 26:28; Ro 6:10; Pil 3:20; Tit 2:13

Eemon yes tau tigde tila tigharau Maaron ve tisuŋ pani na, watoonrau tauvene irau igham zi tiduduun kat ila i maata ne mako. ² Ve imin ta watoonrau tawe ireu sosor toozi isov ilale, ve igham zi tingalaan kat ila Maaron maata irau saawe, kanan tiyamaan tigde lezi sosor mako, ve tipul ngar to ravuun ngai pa rewaan sosor. *

³ Eemon mako. Watoonrau tau ndaman isov tighamgham zi na, ene igham zi matazi ingalngal sosor toozi. ⁴ Pasaa, siŋ to makau ma mekmek, ene irau ireu sosor to tamtamon mako.

⁵ Tauta saawe tau Krisi izilam taan, i isaav pa Maaron ighe:

“Ngar to ravuun gabua imin watoonrau tomania ngar to ghamuun aniiŋ imin paitoonghom, ene yo lolom pani mako.

Eemon yo ugharaat anonag pataghaan wa. Leso imin niag to naleep ila. * *

⁶ Ve ngar to ghuruun gabua izala artaal leso yav ighan dodolini, tomania ngar to ravuun gabua pa rewaan sosor to tamtamon, ene paam, irau lolom mako.

⁷ Tauta nasaav naghe: ‘Maaron, ughita. Yau taug tane. Yau nalam to nataghon yo lolom. Ngar tau naghe naghamu, ene saveeŋa ti-boode pataghaan wa.’ ”

⁸ Aghita. Papazoge, Krisi isavia watoonrau tau tighamgham zi itaghon tutuun to Mose na ighe: “Ngar to ravuun gabua imin watoonrau, tomania ngar to ghamuun aniiŋ imin paitoonghom, ve

* **10:2:** Kol 2:17; Hib 7:19, 9:9+ * **10:5:** Saveeŋ tane isavia saawe tau Maaron Naatu izilam taan gha imin tamtamon.

* **10:5:** Mbo 40:6, 50:9

ngar to ghuruun gabua izala artaal leso yav ighan dodolini, ve ngar to ravuun gabua pa rewaan sotor to tamtamon, ngar naol tane, yo lolom pa ughe tigham tauvene mako. Ngar tauvene, ene irau lolom mako.” *

⁹ Ra isaav muul ighe: “Maaron, ughita. Yau taug tane. Yau nalam to nataghon yo lolom.” Saveen tane, ngara tauvene: Eez munngaana to watoonrau tau i isavia imin maata na, i irav motini, ve iyoli pa eez paaghu wa. ¹⁰ Tauvene Yesu Krisi iyoki tauu gha imaat pai eemon itaghon Maaron loolo to ireu sotor toit. Tauta aazne, i igham ghiit tamin tamtamon patabuyaana to Maaron wa. *

¹¹ Saawe ta naol ne, yes to watoonrau tisov tiy-ozyooz ila artaal naagho, ve tinoknok ghamuun watoonrau raraate mon. Eemon watoonrau toozi tawe irau ireu sotor eta mako. ¹² Ve Krisi, i igham watoonrau eemon geeg to ireu sotor to tamtamon, ra izala pa sambam, ve mboole izi ila Taama Maaron niima tapir. Watoonrau tooni tawe, tapiri igheen irau saawe. Muun, aazne, ve itaghon gha ila. *

¹³ Tauvene saawe tana ve ilam, Krisi ileep izi sambam, ve isasaanan Maaron to itatan koina le tapirizi isov, o i ivaghaaz zi ila aaghe saamba. *

¹⁴ Watoonrau eemon geeg tau Krisi ighamu na, ene igham tamtamon tiduduun kat ila Maaron maata. Ve yes aat tileep tauvene taghon taghon gha ila. Ve aazne, i ighamgham uratoi zi leso titaghon dudunai ngar patabuyaana.

* **10:8:** Hos 6:6; Mt 9:13, 12:7 * **10:10:** Yo 17:19; Hib 9:28, 13:12

* **10:12:** Mk 16:19; Kol 3:1; Hib 1:3, 8:1 * **10:13:** Mbo 110:1; Hib 1:13

15 Avuvu Patabuyaaj paam ipariaaj ghiit to taghur ila saveej tane. Pasaa, imin maata, i isaav ighe:

16 “Eez paaghu tau pale naghuru pa yes Israela, ene vene:

Murei, yau pale naghur tutuuj tsiau igheen ariaaj ila lolozu, ve naboode ila ngar toozi paam.” *

17 Ra isaav muul ighe:

“Ve ngar toozi sasaghati naol tau isapir pa tutuuj tsiau na, yau aat nareua ilale, ve matag ingali muul mako.” *

18 Tauvene aghita. Isaav ighe Krisi ireu sosor toit isov ilale, na watoonrau to rewaan sosor paam, ene le uraat muul mako.

Taghur ila to Krisi ariaaj, ve tala tagharau Maaron

19-20 Saawe tau Yesu imaat ve iburig muul, i ilon ila balbaal to nugh sambam. Ve uuli tau ipon-poon nugh patabuyaaj na, i irangat perekaini, ve malmali ila peria to Maaron. Tauta gabua eta ipoon ghiit pa Maaron muul mako. Tauvene yam tonvetaz, iit taroi pa talon tala nugh tau patabuyaaj kat ve tala peria to Maaron sov. Pasaa, sinj to Yesu igharaat eez paaghu pait wa. Eez tawe, ene i tauu. Pasaa, i ileep maata yaryaare ve iuluul ghiit. *

21 Aazne, iit leen neer tiina ee to watoonrau. I daaba tau ingin ruum to Maaron. Ruum tane, ene iit tamtamon tooni. *

* **10:16:** Yer 31:33+; Hib 8:10+ * **10:17:** Yer 31:34 * **10:19-20:** Mt 27:51; Yo 14:6; Ep 2:18 * **10:21:** Hib 4:14

22 Tauvene tala tagharau Maaron toman loloon eemon, ve taghur ila tooni ariaañ taghe i irau iuul ghiit. Pasa, Maaron itir Yesu sinj tooni izala pavoov, ve taririu pa yaa ngalaanja wa. Tauvene ngar toit sasaghati tau muun igham ghiit taya-maan taghe tasaghat ila Maaron maata na, ene i ireua isov ilale, ve igham ghiit tangalaan kat wa. *

23 Iit taghur ila saveen mbuaan to Maaron tau ighe i pale igham lepoogh poia pait. Tauta taghurghur mataan pa lepoogh poia tawe, ve tavovotia saveenja pa tamtamon. Saveen mbuaan tooni tawe, loloon ruru pani sov. Taghur ila ari-aan ve takisi tunja. Pa Neer tau imbu saveen tana, i itataghon saveen tooni. *

24 Ve tail eez to tapaburigin zetaanja, lesu iit tasov loloon pa tamtamon ve tagham poghani zi, ve tagham uraat popoia maata maata. *

25 Ve ngar to talup ghiit pa sunuun, ene tapuli sov. Yau nasavia saveen tane pasaa, tamtamon tsiam siriv, naghozi perperia pa lupuun tsiam mako. Tauvene matamim ingal ve aluplup gham ve avapaloti gham. Pa aghita. Saawe to Tiina toit, ene ilam igharau wa. *

Ighe taghur muriin pa Krisi, ene leen eez muul mako

26 Aloon. Isaav ighe taloon saveen onoon to Krisi ve ngar toit ighazoon pani, eemon murei ngar toit

* **10:22:** Ezek 36:25; Ep 5:26; Hib 9:14 * **10:23:** 1Kor 1:9; 1Tes 5:24; Hib 3:6 * **10:24:** Hib 3:13 * **10:25:** Mbanj 2:42; Ro 13:11; Kol 3:16

iyaryaan muul pa taghoniin ngar saghati, ene aat leen watoonrau ite paam to ireu sosor toit mako. *

²⁷ Ighe tagham tauvene, iit leen eez eta muul mako. Tauvene roinj tiina pale igham ghiit ve talepleep, ve tasasaan mon pa gabizoon to Maaron ve atuya tau pale ighuru pait. Atuya tawe, ene yav tiina tau pale ighan yes tau tizorzoor Maaron. *

²⁸ Matamim ingal tutuun to Mose. Tutuun tawe, ariiaan kat. Isaav ighe neer eta maata veleghini ve imalaan pani, ve ighe tamtamon ru, ma tol tighita, ve tipariaan saveen tigde i igham ngar tawe, i aat imaat. Irau lolozi isaghatini mako. ²⁹ Laak, isaav ighe ngar tauvene ivotvot pa yes tau matazi veleghin tutuun to Mose, ene pale mindai pa tamtamon tau ighe maata veleghin Maaron tauu Naatu? I pale igham atuya tau saghati le saghati kat. Onoon, Krisi sin tooni imalin, leso ipariaan saveen mbuaan to eez paaghu, ve igham neer tana imin Maaron le. Eemon neer tana ivelegh sin patabayaan to Krisi imin kaut sorok, ve maata iveleghin Maaron Avuvu tau poia puughu na. *

³⁰ Iit tawatagh Neer tau isaav ighe:

“Uraat to yatuun ngar sasaghati to tamtamon, ene yau uraat tsiau. Yau taug pale naghur atuya pazi.” *

Ve saveen tooni ziiri ite isaav tauvene:

“Neer Tiina pale igabiiz tamtamon tooni ve ighur atuya pazi.” *

* **10:26:** Hib 6:4+; 2Pe 2:20+ * **10:27:** 2Tes 1:8+; Hib 12:29; Syg 20:15 * **10:29:** Lo 32:35+; Hib 2:2, 12:25 * **10:30:** Lo 32:35; Ro 12:19 * **10:30:** Mbo 50:4, 135:14

³¹ Tauvene iit taroi pa Maaron maata yaryaare. Pa i niima malaua. Isaav ighe ikis ghiit ve ighur atuya pait, ene pale saghatiinj tiina igham ghiit. *

Tayooz ariaaņ pa badooņ pataņani

³² Matamim ingal imuul ila pa muuņ, saawe imin maata tau Maaron ipaghazoņai gham pa vaaru poia na. Saawe tana, tamtamon tighur pataņani tiina kat payam pasaa, yam ataghon Krisi. Eemon yam apul ghuruuņ ila tsiam mako, ve ayooz ariaaņ pa badooņ pataņani. *

³³ Saawe siriv, tipayooz gham ila eval tiina matazi, ve tisik saveeņ veleghiinj payam, ve tigham saghatin gham. Ve saawe siriv, tigham ņgar tauvene pa zeetmimņa paam. Tauta lolomim isaghatin zi, ve ayooz tomani zi pa badooņ pataņani toozi tawe. ³⁴ Ve saawe tau tikis zeetmimņa siriv ve tighur zi tiloņ tila ruum to yavyavuuņ, ene paam, lolomim isaghatin zi ve auul zi. Ve saawe tau tamtamon tilat gha tiyauur gabua tsiam imin lezi na, lolomim poia mon. Pasaa, awatagh aghe: Yam lemim gabua poia tau iliiv kat pa gabua tsiam tau tiyau zi na. Gabua tawe, ene gabua tauu, ve igheen le alok. *

³⁵ Tauvene ņgar tsiam tau aroi mako ve ayooz ariaaņ pa ghuruuņ ila tsiam na, apuli sov. Pa ighe akis ņgar tana, ene pale aghita atuya tiina tau poia kat. *

* **10:31:** Lu 12:5 * **10:32:** Pil 1:29+ * **10:34:** Mt 6:20, 25:36;
Hib 13:3; 1Pe 1:4+ * **10:35:** Mt 5:11+

³⁶ Tauvene yam aat ayooz ariaan, ve ataghon Maaron loolo. Leso aghita saveen mbuaan tooni anoonja. *

³⁷ Pasaa, Maaron saveen tooni isaav tauvene. Ighe:

“Neer tau ighe ilam na, malau mako pale ilam ivot. Irau izuar mako.

³⁸ Ve tamtamon tsiau tau titaghon ngar duduunja na, ene pale ghuruun ila toozi igham pooz pa lepoogh toozi.” †

Eemon isaav ighe tamtamon eta iroi, ve loolo ighurghur ighe ighur muuri payau, ene aat lolog poia pani mako.” *

³⁹ Ve iit tamin yes tau tiroi ve tighur murizi pa Maaron gha tilalez ne mako. Iit tamtamon to takis ghuruun ila toit tunja, lesa taleep mataan yaryaare le alok.

11

Ngar tauu to ghuruun ila

¹ Ngar to ghuruun ila, ene vene: Gabua popoia tau taghurghur mataan pani na, loloon ruru pani mako, ve ngar toit iyaryaan taghe onoon, gabua tawe pale tivot. Ve gabua tau aazne taghit zi pa mataan mako na, ngar toit iyaryaan taghe onoon, gabua tawe tighengheen. *

² Timbuunja to muun, ghuruun ila toozi iyaryaan tauvene. Tauta Maaron loolo poia pazi ve ipait zi.

* **10:36:** Lu 21:19; Hib 12:1; Syg 13:10 † **10:38:** Eez ite to tator saveen tane, ene vene: “Tamtamon tsiau tau tiduduun ila yau matag, ene pale tighur ila ve tigham lepoogh poia ilam tsiau.”

* **10:38:** Hab 2:3+; Ro 1:17 * **11:1:** Ro 8:24+; 2Kor 4:18, 5:7

³ Ghuruuŋ ila to it, ta igham ghiit taghilaal taghe: Maaron isaav mon, ve sambam ve taan tomania gabua ta naol ne tivot. Tauvene gabua isov tau aazne taghit zi ne, Maaron igharaat zi pa gabua eta tau iit irau taghita pa mataan ne mako. *

Ghuruuŋ ila to Avel, Enok ve Noa

⁴ Muuŋ, Avel ighur ila to Maaron. Tauta igham watoonrau poia le iliiv watoonrau to toogha Kain. Ghuruuŋ ila tooni tawe tauta igham Maaron loolo poia pani ve watoonrau tau i igham pani na, ve ipaiti ighe i ŋeer duduunja ee. Tauvene onoon, Avel imaat wa. Eemon ghuruuŋ ila tooni tana, ene imin Avel isavsaav pait soone. *

⁵ Enok ighur ila to Maaron. Tauta imaat mako, ve Maaron ighamu gha izala pa sambam. Murei, tamtamon tiilo le mako. Pasaa, Maaron ighamu gha izala wa. Ve saawe tau Enok ilepleep izi taan, tipait vaaru tige ŋgar tau i itaghoni na, igham Maaron loolo poia. *

⁶ Eemon isaav ighe taghur ila to Maaron mako, ene irau i loolo poia pait mako. Pasaa, tamtamon tau ighe ila igharau Maaron, i aat ighur ila ighe Maaron ilepleep ve ighamgham atuya popoia pa yes tau tizuari zi pani.

⁷ Noa ighur ila to Maaron ve iroron pani. Tauvene saawe tau Maaron isaav taraini pa pataŋani tau ighe ivot na, i itaghon Maaron aliiŋa ve igharaat waan. Onoon, pataŋani tauvene ivot aaz eta gha tamtamon tighita soone. Eemon Noa ighur ila Maaron aliiŋa. Tauta iuul tauu tomania

* **11:3:** Gnp 1:1+; Mbo 33:6+; 2Pe 3:5 * **11:4:** Gnp 4:4+; Hib 12:24 * **11:5:** Gnp 5:24

azaawa, ve natɲa tomania azuwazɲa ve tileep poi. Tilalez mako. Ngar tau i ighamu, ene ipaghazonjai ngar saghati to tamtamon tau tileep izi taan pa saawe tana gha ivot ighazonj. Ghuruuɲ ila tooni tawe, tauta Maaron ighita ighe i njeer duduunja. *

Ghuruuɲ ila to Abaram

⁸ Saawe tau Maaron ipoi Abaram, i isaav pani ighe ipul nugh tooni, ve ila pa taan tau i ighe igham pani, leso imin le motot. Onoon, saawe tana, Abaram ikankaan pa saa nugh tau pale i ila ileep pani. Eemon i ighur ila to Maaron. Tauta iloonj aliinja, ve iburig gha ipul nugh tooni, ve ila. *

⁹ Abaram ighur ila. Tauta ileep imin loom izi taan tau Maaron imbu saveenj pani na. I le ruum tauu mako. Ipapayooz balbaal mon, ve ilepleep ila. Ve murei, naatu Isak ve tiimbu Yakop titaghon ngar eemon. Ve saveenj mbuaan tau Maaron igham pa Abaram na, saveenj eemon, tauta i isavia pazi paam. ¹⁰ Abaram ileep tau-vene pasaa, i ighurghur maata pa nugh tiina tau Maaron igharaata itaghon i tauu ngar tooni na. Nugh tawe, puughu ariaanja, ve igheen tauvene irau saawe. * *

¹¹ Abaram ighur ila. Tauta Maaron tapiri izaa to yesuru Sara ve tipoop. Onoon, yesuru timin zikoonj ve saawe toozi to popaanj isov wa. Eemon Abaram ighur ila ighe Maaron itataghon saveenj

* **11:7:** Gnp 6:13+; Ro 3:22 * **11:8:** Gnp 12:1+ * **11:10:** Nugh tiina tane, ene nugh sambam. * **11:10:** Hib 12:22, 13:14; Syg 21:2

mbuaan̄ tooni. Tauta ighita saveen̄ tawe anoon̄a.
*

¹² Tauvene aghita. Abaram, i neer eemon geeg ve imin koon̄ wa. Eemon yesuru azaawa Sara tipoop, ve tamtamon tau tivot ila tooni na, katini kat. Irau tanin zi mako. Pasaa, timasa timin naol imin pitum to sambam saamba, ve sausau to nari.
*

¹³ Yes tisov tawe, ghuruun̄ ila toozi ighamgham pooz pazi le irau mateegh toozi. Onoon, saveen̄ tau Maaron imbua tomani zi na, yes tighita anoon̄a mako. Pasaa, saawe to saveen̄ tawe ighur anoon̄a, ene ighengheen malau soone. Eemon lolozu poia pa saveen̄ mbuaan̄ to Maaron imin tighita anoon̄a wa. Ve tivotia tauzi tigde: “Taan, ene nugh tsiei duduun̄ mako. Lepoogh tsiei to taan, ene nileep nimin loom mon. Pasaa, nugh tsiei duduun̄, ene sambam.” *

¹⁴ Tamtamon tau tisaav tauvene, ene tipaghazon̄ai tauzi tigde nugh toozi duduun̄ eta aat ighengheen. Tauta tiliilo soone. ¹⁵ Ve imin ta tigham ngar tiina pa taan toozi tau tipuli na, ve tipasawal pani, kanan̄ yes irau timuul tila. ¹⁶ Eemon mako. Pasaa, ngar toozi iyaryaan̄ pa nugh ite tau poia kat iliiv nugh tau tipuli na. Nugh tawe igheen izi sambam. Tauta saawe tau tipoi Maaron tigde i Maaron toozi, i maaya pa saveen̄ toozi tawe mako. Pasaa, nugh tau tighurghur matazi pani na, i ighuru pazi pataghaan̄ ve isasaan̄ zi. *

¹⁷⁻¹⁸ Abaram ighur ila to Maaron. Tauta saawe

* **11:11:** Gnp 17:19, 21:2; Ro 4:18+ * **11:12:** Gnp 15:5, 22:17

* **11:13:** Gnp 23:4; Mbo 39:12; 2Kor 5:7 * **11:16:** Pil 3:20; Hib 13:14

tau Maaron itoova ve isaav pani ighe irav naatu eemon Isak imaat imin watoonrau, i ighe igham tauvene itaghon Maaron aliija. Onoon, muuj Maaron imbu saveej pani ighe: “Paaghu tsio duduuj pale tivot ila to natum Isak.” Eemon Abaram injuruut naatu tawe mako. *

¹⁹ Pasaa, i igham ngar ighe: Isaav ighe Isak imaat, ene Maaron irau ipaburigini pa mateegh. Ve ngar tau ivot pa Isak na, ene imin ta i imaat wa, eemon Maaron ipaburigini pa mateegh, ve ighuru imuul ila to taama Abaram. †

Ghuruuj ila to Isak, Yakop, ve Yosep

²⁰ Isak ighur ila to Maaron. Tauta ighur poia to Maaron iza to natja ru, Yakop gha Esau, ve isaav pa gabua tau murei pale ivot pazi. *

²¹ Yakop ighur ila to Maaron. Tauta saawe tau iyamaan tauu ighe mateegh tooni igharau, i ighur poia to Maaron iza to Yosep natja ru le isov, ra iwat aaze ila titi tooni, ve isuj pa Maaron. *

²² Yosep paam ighur ila to Maaron. Tauta saawe tau iyamaan tauu ighe mateegh tooni igharau, i isaav pa yes Israela ighe murei Maaron pale igham zi tipul Isip. Ve isaav pazi pataghaan pa tuua. Leso saawe to tiburig, matazi ingal tuua, ve tighamu tila ve titavia izi taan Kanaan. *

Ghuruuj ila to Mose

²³ Mose taama gha tiina tighur ila to Maaron. Tauta saawe tau tipopa, tiroi pa kinik to Isip

* **11:17-18:** Gnp 21:12, 22:1+; Yems 2:21+ † **11:19:** Ngar tau ivot pa Isak, ene imin ilaal pa burigiin to Krisi. * **11:20:** Gnp 27:27, 39+ * **11:21:** Gnp 48:15+ * **11:22:** Gnp 50:24

aliinja mako, ve tingooz natuzi tawe irau kaiyo tol. Pasaa, tighita imin geegeu siriv mako. Naagho poia le poia kat. *

²⁴ Mose paam ighur ila to Maaron. Tauta saawe tau itum gha imin olman, loolo pa tamtamon tiwaato tighe i kinik to Isip natliva naatu mako. ²⁵ I irau itaghon yes Isipa ve yesja tigham ngar sasaghati naol to uliin tau igham loloon poia rigmon ve isov. Eemon i loolo pa ngar tawe mako. I ighita ighe poia pa ila ipaak Maaron tamtamon tooni, ve yesja tibaad patanjani. ²⁶ Mose igham ngar tauvene: Isaav ighe tamtamon tipamayanini, ve tighur patanjani pani imin tigham pa Mesia, ene poia. Pasaa, i ighurghur maata pa atuya poia tau murei pale Maaron igham pani. Ve ighita ighe atuya tawe, ene iliiv kat pa kuaz isov to yes Isipa. *

²⁷ Mose ighur ila. Tauta iburig ve ipul Isip. I iroi pa aatyavyav to kinik mako. Onoon, iit tamtamon irau taghita Maaron pa mataan mako. Eemon Mose, i iyooz ariaanj imin ighitghita Maaron pa tauu maata. *

²⁸ Mose ighur ila to Maaron. Tauta ipaburigin ngar to Pasova, ve isaav pa yes Israela gha tikum sin izala ataman toz toz. Leso anjela tau Maaron imbaano ila pa ravuun yes Isipa natuzja aidabazja na, igham gabua eta pazi sov. *

²⁹ Eval tiina to Israel tighur ila to Maaron. Tauta saawe tau timbut Te Sinjsinai gha tila tivool ziige ite, yes tilaagh imin tilaagh ila taan mamaasa.

* **11:23:** Igham 2:2+ * **11:26:** Hib 10:33, 13:13 * **11:27:**
Igham 2:10+; 2Kor 4:18 * **11:28:** Igham 12:21+

Eemon saawe tau yes Isipa titoova to titaghon zi, te ipol imuul ilam izala pavozi, le tiso v tighun te gha timataar. *

³⁰ Eval tiina to Israel tighur ila. Tauta tilaagh livutin nugh tiina Yeriko irau mataaz liim ve ru. Ra didiinj arianaazi tau tilivutin nugh na tiso v tipolpol tizi. *

³¹ Reap, i livaa to eez. Eemon ighur ila to Maaron. Tauvene saawe tau Yosua imbaan yes padewaanja tila to tighita nugh, Reap igham zi tila ruum tooni, ve injin poghani zi. Tauta saawe tau yes Israela tiravuur eval tiina to Yeriko tau tizorzoor Maaron aliinja na, tirav Reap mako. Tipuli ileep. *

Tamtamon siriv tau tighur ila ariiaan

³² Poia, irau nayoot saveen ila malau mako. Pasaa, leg saawe to nasinai pa Gideon, Barak, Samson, Yepta, David, Samuel, ve yes propet tau muunj tivotia Maaron aliinja ne mako. *

³³ Zeran tawe tighur ila to Maaron. Tauta i ipalot zi gha siriv tiparav le tiliiv kinik siriv tau tinjin taan tintiina na. Ve yes siriv tau tighamgham pooz na, tipalot tamtamon to titaghon ngar duduunja. Ve tamtamon toozi siriv tighita saveen tau Maaron imbua tomani zi na anoonja. Ve siriv, laion irau to tighan zi mako. *

³⁴ Siriv, tisik zi tila yav tiina loolo. Eemon yav le tapiri irau to ivaghamun zi mako. Ve siriv,

* **11:29:** Igham 14:21+ * **11:30:** Yos 6:1-20 * **11:31:** Yos 2:1, 6:22+; Yems 2:25 * **11:32:** Het 4-16; 1Sam 1:1; 1King 2:12

* **11:33:** Dan 6:1+

Maaron ipaghau zi pa mbuzaagh maata. Siriv, tapirizi imbool. Eemon Maaron ipalot zi, tauta tiparav ariaan le tiliiv zaaba to nugh siriv, ve tinaan koiazna tawe tila. *

Tamtamon siriv, ghuruun ila toozi ipalot zi, tauta tiyooz ariaan pa badoon patajani

³⁵ Ve zilivaa siriv, Maaron ipaburigin mateegha toozi. *

Tamtamon siriv, koiazna tighur yavyavuun maata maata pazi, ve tisaav pazi tauvene: “Isaav ighe yam aghur murimim pa Maaron tsiam, ene pale nipul gham ala.” Eemon yes tiloon alinazi mako, ve tiyooz ariaan pa badoon patajani. Pasaa, tighur ila tigde Maaron pale ipaburigin zi pa mateegh, ve tigham lepoogh poia kat tau iliiv patajani naol tau tibaad zi izi taan. ³⁶ Ve siriv, tamtamon tipanizai zi ve tilos zi. Siriv, tikau nimazi ma aghezi pa sen, ve tighur zi tilon tila ruum to yavyavuun. *

³⁷ Ve siriv, tirav zi pa maet. Siriv, tighorot zi pa so timin sirivu ru. †

Ve siriv, tirav zi pa mbuzaagh gha timaat. Tamtamon siriv tileep saghat. Mbolaan igham zi, ve lezi nonoghiina poia eta mako. Tinonogh zi pa sipsip ma mekmek uuli mon. Ve tamtamon tigham saghatin zi, ve tighur patajani naol pazi. *

* **11:34:** Het 7:19+; 1Sam 17:51; Dan 3:1+ * **11:35:** 1King 17:21+; 2King 4:32+ * **11:36:** Yer 20:2 † **11:37:** Sinain ee to yes Yuda isaav tauvene: Muun, tighorot propet Isaia imin sirivu ru. * **11:37:** 1King 21:13; 2Sto 24:21; Mban 7:58, 14:19

³⁸ Zeran tawe, tamtamon popoiazi kat. Timin eval tiina tau titaghon ngar to taan ne mako. Zeran tauvene, taan tane poia irau to tileep pani ne mako. Aghita. Lepoogh toozi, poia mako. Lezi n-azi poia eta to lepoogh mako. Tauta tivalaghlaagh taghon nugh nginaanja ve loloz. Ve tilepleep ilonj ila taan ve maet purazi. *

³⁹ Tamtamon tisov tau nasavi zi na, tighur ila to Maaron. Tauta Maaron loolo poia pazi ve ipait zi. Eemon saawe tau tileep izi taan, toozi eta ighita saveen mbuaan to Maaron anooja mako. ⁴⁰ Pasaa, muun geeg, Maaron loolo ighur pataghaan ighe igham gabua poia ee § tau pale iuul zi ve iit paam. Leso tasov taduduun kat ila i maata. Ve i loolo pa yes tighamu imin maata mako. I ighe ilup ghiit tomani zi, ve iit tasov taghamu raraate.

12

Yesu itotoi ghiit pa ngar to tayooz ariaan

¹ Eval tiina to muun tau ngarig nasavi zi ne, ene imin tiyooz livutin ghiit ve tipariaan ghiit to taghur ila. Ighe tauvene, ene pale tagham mindai? Lepoogh toit, ene imin taparloos pa landoon tiina, ve talaan sooso malau. Tauvene gabua naol tau tipatanan ghiit pa landoon, tomania ngar sasaghati isov tau ikau ghiit ne, iit aat tapuliir zi tizi. Ve talaan toman tapiriin taghon eez tau Maaron ighuru

* **11:38:** 1King 18:4, 19:9 § **11:40:** Gabua poia tau i isavia, ene uraat to Yesu Krisi.

pait na, ve takiskisi tauvene le tapasov landoon toit. *

² Ve mataan ila pa gabua ite paam sov. Mataan ila pa Yesu mon, ve talaan njaruini tala. Pasaa, i ta imuun pait ve itotoi ghiit pa eez to ghuruun ila. Ve i ta pale igham uratoi ghiit le ghuruun ila toit ivot le iduduun kat ila Maaron maata. Aghita. I ibaad patanani, ve tiravu imaat izala ai pambaroon. Eemon i ighita mayanja tawe imin kaut sorok. Pasaa, i iwatagh: Isaav ighe itaghon dudunai Maaron njar tooni, ene pale murei ileep poia toman tintini. Tauta aazne, i ileep ila Taama Maaron niima tapir igharau niia to ghamuun pooz. *

³ Onoon, saawe tau i ileep izi taan, zeran sasaghati tighur koi pani, ve tizorzoora. Eemon i iyooz ari-aan pa badoon patanani tawe. Tauvene matamim kisin njar tau i ighamu na, ve ataghoni. Mako pale patanani tsiam itatan gham le tapirimim isov. *

Maaron ipul patanani siriv ivot pa natja, lesa ipaduduun zi

⁴ Onoon, yam aparav ari-aan to atatan saghati tapiri. Eemon tsiam eta sin tooni imalin soone.

⁵ Yam aat lolomim iveegh pa saveen palotiin ee tau injarui yam tau amin Maaron natja na? Isaav ighe:

“Natug, isaav ighe Neer Tiina ighur patanani eta payo to ipaduduun ghom, na ughita imin gabua sorok sov. Ugham njar pani poi. Ve isaav ighe i iyaon ghom, na lolom isaghat sov.

* **12:1:** 1Kor 9:24+; Pil 3:13+; Hib 10:36 * **12:2:** Pil 2:8+; Hib 1:3, 3:1 * **12:3:** Lu 2:34; Syg 2:3

⁶ Pa tamtamon tisov tau Neer Tiina loolo igheen toozi na, i ipapaduduun̄ zi.

Ve tamtamon tisov tau i igham zi timin nat̄ja, ene i iloslos zi, leso igham zi tighilaal.” *

⁷⁻⁸ Tauvene isaav ighe patan̄ani eta ivot payam, na ayooz ariaan̄, ve abaado mon. Pa patan̄ani tana, ene eez to Maaron ipaduduun̄ gham. I ighamgham tauvene pa nat̄ja tisov. Aghita. Isaav ighe marani eta igham sosor, pale taama ipuli? Mako. Geegeu tisov, tamaz̄na tipaduduun̄ zi. Ve Maaron tauvene paam. I ighurghur patan̄ani ivotvot pa nat̄ja tisov, leso ipaduduun̄ zi. Eemon isaav ighe i ipaduduun̄ ghom mako, ene aat i naatu yo mako. Yo umin neer tau le taama mako. *

⁹ Ve gabua ite paam. Iit tawatagh: Tamaan̄a to taan tiloslos ghiit, leso tipaduduun̄ ghiit. Ve saawe tau tigham tauvene, iit taroron pazi ve taneneen̄ mon. Ighe tauvene, mindai pa Tamaan Maaron tau in̄gin anunuun na? Pasaa, i iliiv tamaan̄a to taan. Tauvene isaav ighe i ighur patan̄ani eta pait to ipaduduun̄ ghiit, na tapul tauun̄ ila i niima, ve tabaado mon. Leso murei, tagham lepoogh poia. ¹⁰ Tamaan̄a to taan tipaduduun̄ ghiit pa saawe tuuku mon, itaghon n̄gar toozi tau tauzi tighita tigde poia. Eemon Tamaan Maaron, i ipapaduduun̄ ghiit leso iuul ghiit kat, ve tataghon n̄gar patabuyaan̄ imin i tauu. *

¹¹ Onoon, saawe tau tilos ghiit, loloon poia mako. Loloon ipatan̄an. Ve isaav ighe Maaron ighur

* **12:6:** Lp 3:11+; Yems 1:12; Syg 3:19 * **12:7-8:** Lo 8:5; Lp 13:24

* **12:10:** 1Pe 1:15+; 2Pe 1:4

pataņani pait to ipaduduunġ għiit, ene pale nġara raraate mon. Eemon loloon ipataņan pani geeg sov. Pa ighe pataņani tana igham nġar toıt ivot, ene pale murei tataghon nġar duduunġa, ve tagħita anooņa tauvene: Itiņa Maaron pale tavalupu għiit tamin eemon, ve taleep toman loloon luuma. *

¹² Yam siriv amin tamtamon tau ilaan sooso malau, le tapiri isov, ve niima ma aaghe imatmaat. Eemon apariaaņ taumim ve akiskis landooņ le apasovu! *

¹³ Ve matamim iņgal to ataghon eez duduunġa to Maaron mon. Leso apalot zeetmimņa siriv tau tiyooz ariaaņ soone na, ve ghuruuņ ila toozi ivot imin tiina le iyaryaāņ. Tauvene matamim imo-moos poi pa taumim. Pa ighe asosor pa eez to Maaron, ene pale agham zi titap le tisaghat kat. *

Tayamaan tauun. Mako pale tataghon nġar to taan imin Esau

¹⁴ Azuari gham to atotoi nġar luuma pa tam-tamon tisov. Leso yamņa avalupu gham amin eemon. Ve azuari gham pa nġar patabuyaāņ. Pa tamtamon tau ighe itaghon nġar patabuyaāņ mako, ene irau ighita Nġeer Tiina mako. *

¹⁵ Matamim imomoos poi pa taumim. Mako pale nġar sagħati izeev tsiam eta, ve ighur muuri pa Maaron ve poia tooni. Tamtamon tauvene, i imin waar waraman tau itum izaā ila sosomim. I pale ivagħamunia tamtamon katini, ve igham zi tis-agħat ila Maaron maata. *

* **12:11:** Yems 3:17+ * **12:12:** 2Tim 4:7 * **12:13:** Lp 4:26

* **12:14:** Mt 5:9; Ro 12:18; 2Kor 7:1; 1Pe 1:15+ * **12:15:** Lo 29:18; 2Kor 6:1; Hib 3:12

¹⁶ Ve tsiam eta ighur boog sov. Ve eta ighur muuri pa Maaron ve n̄gar tooni iyaryaan pa gabua to taan imin Esau sov. Iit tawatagh: Esau, i n̄eer aidaaba, ve eeza pa ghamuun gabua naol to taama. Eemon i igham n̄gar pa gabua tana mako, ve iravol eeza tawe pa sur rubruub eemon geeg. *

¹⁷ Ve yam awatagh. Murei Esau ila to taama ve ighasoni ighe ighur poia to Maaron izaa tooni, eemon taama izori. Esau imbuur ariaan toman tan̄iiz tiina. Eemon sosor tau i ighamu na, ene le eez eta to igharaata muul mako. *

*Eez paaghu to tala tagharau Maaron iliiv eez mun̄gaana tau ivot izi loloz Sinai
(Igham 19:12, 20:18+)*

¹⁸⁻¹⁹ Aazne, yam alam avot nugh tau irau aghita pa matamim ve akisi pa nimamim imin yes Israela na mako. Muun, saawe tau Maaron ivot pazi izi loloz Sinai, yes tighita yav tau ighanghan izala loloz Sinai daaba, tomania taitai gabgabuai tau ikau loloz tawe, ve ndoroom tiina, nugh ighani milmilia, ve yaghur tiina. Ve tiloon gabua tau luutu imin tavuur itan toman aliin̄a tiina. Ra tiloon Maaron aliin̄a. Tauta roin̄ tiina igham zi le tisaghat kat. Ve titan̄ rarai Mose tigde isaav pa Maaron, leso isavsaav pazi muul sov. ²⁰ Pasaa, tiroi pa tutuun̄ ariaan̄a tau Maaron isavia pazi ighe: “Tamtamon ma n̄gai eta ighe ila itut loloz puughu, ene aat tiravu pa maet le imaat.” ²¹ Mose ighita gabua naol tawe, le i paam iroi kat, ve isaav ighe: “Roin̄ igham ghau le tinig irur kat!”

* **12:16:** Gnp 25:29+ * **12:17:** Gnp 27:30+

²² Eemon yam aazne, alam avot nugh tauvene mako. Krisi igham gham alam avot loloz Zion wa. Ene Yerusalem to sambam, nugh tiina to Maaron maata yaryaare. Añela ndiñndiñ ndiñndiñ tiluplup zi ta sewe toman tintinizi. *

²³ Ve yam aleep ila lupuun to Maaron natña aid-abazña. *

Tamtamon tisov tau tileep ila lupuun tana, yes timin nugh sambam tamtamona. Tauta ezazi ighenaar ila rau to nugh tawe. Ve aazne, yam agharau Maaron wa. I Neer tau pale igabiiz tamtamon tisov ve ighur atuya pazi. Ve ala avot to zeran dudunazi tau aazne tileep izi nugh sambam. Zeran tawe, Maaron igham ñgar toozi isov poia mon ila i maata. *

²⁴ Ve aazne, ala avot to Yesu. I ta iyooz bodbodaan pait ve Maaron, ve igharaat eez paaghu to itiña Maaron tavalupu ghiit tamin eemon. Siñ tooni, tauta ipariaan saveen mbuaan to eez paaghu tawe. Tauvene siñ tooni iliiv siñ to Avel. Pasaa, Avel siñ tooni ipoipoi Maaron ighe iyatu. Eemon siñ to Krisi, ene ipoipoi Maaron ighe ireu sosor toit. *

Tapoon taliñaan pa Maaron aliña sov

²⁵ Aloonj. Aazne, Maaron tauu isavsaav pait. Tauvene apoon taliñamim ve azoor saveen tooni

* **12:22:** Ga 4:26; Pil 3:20; Syg 21:2 * **12:23:** Saveen tane, ene saveen palelaan. Pasaa, iit tau taghur ila to Krisi na tamin Maaron natña aidabazña duduun mako. Yesu mon, o Maaron naatu aidaaba duduun. Eemon i pale ipakur ghiit ve igham leen gabua popoia katini, imin ta tamtamon tighamgham pa natuzña aidabazña. * **12:23:** Lu 10:20 * **12:24:** Gnp 4:10+; 1Tim 2:5; Hib 8:6, 9:15+

sov. Aghita. Yes Israela tau muonj tipoon talinjazi pa Maaron aliinja na, irau tipaghau tauzi pa aatyavyav tooni mako. Eemon saawe tana, iivotia aliinja pazi izi taan. Ve aazne, Yesu ileep izi sambam, ve isavsaav pait. Tauvene isaav ighe taghur muriin pani, pale tapaghau tauun pa aatyavyav tooni mindai? Mako le mako kat! *

²⁶ Saawe tau Maaron isavsaav pa yes Israela, aliinja itok taan le katia imin yogyoog. Ve aazne, i imbu saveenj ighe:

“Murei, yau pale natok taan pai eemon, ve isov.

Ve tane mon mako. Pale natok sambam saamba paam.” *

²⁷ Saveenj ziiri tau isaav ighe i pale itok taan “pai eemon ve isov”, ene ngara tauvene: Maaron pale itok gabua isov tau i ighur zi na. Leso gabua tau arianjazi mako na, timbiriis gha tilalez, ve gabua arianjazi tau irau katia mako na, tana mon ta tigheen. *

²⁸ Pooz to Maaron tomania nugh tooni, ene gabua arianjazi. Irau katia mako, ve tigheen tauvene irau saawe. Tauvene iit tau i igham ghiit taleep ila pooz tooni loolo ve ezaan pa talonj tala nugh tooni na, tatotoi loloon poia ila pani, ve taroron pani. Leso sunjuunj tomania besoonj toit itaghon i loolo. *

²⁹ Pasaa, Maaron toit, i patabuyaanj kat.

I imin yav tau ighanghan irau saawe. *

* **12:25:** Hib 1:2, 2:1, 10:26+ * **12:26:** Igham 19:18; Hag 2:6
 * **12:27:** 2Pe 3:10; 1Yo 2:17; Syg 21:1 * **12:28:** Pil 2:12
 * **12:29:** Igham 24:17; Lo 4:24; 2Tes 1:7

13

Eez to tataghon Krisi

¹ Ngar to ghuruuŋ loloon pa tonvetaz to Krisi, apuli sov. Akiskisi. *

² Ve isaav ighe loomba tilat, na agham zi tila ruum tsiam toman lolomim poia, ve angin poghani zi. Ngar tauvene, lolomim iveegh pani sov. Pa muuŋ, tamtamon siriv tigham yes loomba, ve tigue pa yes tamtamon sorok. Eemon mako. Yes tau tigham zi tila ruum toozi na, ene yes aŋela. *

³ Ve matamim iŋgal Maaron tamtamon tooni tau tileep ila ruum to yavyavuunŋ loolo. Agham ngar imin ta yam alepleep tomani zi ta sewe. Ve matamim iŋgal yes tau tamtamon tigham saghatin zi. Agham ngar pa patanani toozi tawe imin yavyavuunŋ igham gham paam, ve auul zi. *

⁴ Yam asov aat aghita ngar to vain imin gabua tiina, ve matamim iŋgal taumim azuwamimŋa, ve aleep tomani zi mon. Leso asaghat ila Maaron maata sov. Iit tawatagh: Yes tau matazi saghati imin nŋgavuun, ve yes tau tighurghur boog na, i pale ighur atuya pazi. *

⁵ Ve lolomim ighaar pa maet sov. Isaav ighe lemim rigta, ene irao. Pa Maaron tauu isaav ighe: “Yau irau napul ghom, ma naghur murig payo ne mako.” *

⁶ Tauvene iit taroi sov. Taghur ila ariaanŋ to Maaron, ve tasaav taghe:

* **13:1:** Yo 13:34+; Ro 12:10; 1Pe 1:22 * **13:2:** Gnp 18:1+; Ro

12:13; 1Pe 4:9 * **13:3:** Mt 25:36; Ro 12:15; 1Kor 12:26; Hib 10:34

* **13:4:** 1Kor 6:9+; Syg 22:15 * **13:5:** Mt 6:25+; Pil 4:11+; 1Tim

6:6+

“Ñeer Tiina, i Uleenja tsiau.
Irau naroi pa gabua eta mako.

Pale tamtamon tigham saa payau?” *

⁷ Matamim iñgal yes tau timuun payam ve tiv-
otia Maaron aliinja payam na. Matamim kisin
ngar poia tau tighamghamu na anoonja tooni, ve
ataghon zi pa ghuruun ila toozi. *

⁸ Pa Yesu Krisi, i itortoor ngar tooni mako. Muun,
aazne, ve murei paam, ngar tooni ighengheen
tauvene irau saawe. *

⁹ Tauvene saveen soroksorok tau isapir pa saveen
to Maaron na, igherev gham gha apul eez tooni
sov. Onoon, zeran siriv tizuari zi tigde le titaghon
katin tutuun maata maata tau inarui aniin ma
gabua siriv. Eemon ngar tau tighamghamu na,
iuul zi mako. Tagham tapiriin ila poia to Maaron,
o poia. *

¹⁰ Iit leen artaal ee ighengheen. Eemon yes
zeran to watoonrau tau tibesbees pa Maaron ilon
ila balbaal patabuyaaj to yes Yuda na, lezi ezazi
to tighan aniin tau igheen ila artaal toit tawe
mako. ¹¹ Aghita. Ndaman isov, ighe saawe tiina to
rewaan sosor ivot, ene daaba to watoonrau igham
sinj to ngai, ve ilon ila balbaal loolo tau patabuyaaj
kat na, ve igham watoonrau pa rewaan sosor to
tamtamon. Eemon ngai anonazi, ene tigham zi tila
soghan pa nugh toozi to lepoogh, mako tighur zi
izala yav ighan zi. ¹² Puughu tane ta Yesu paam,
tigham tivot tila soghan pa nugh tiina Yerusalem,

* **13:6:** Mbo 56:4, 118:6; Ro 8:31+ * **13:7:** 1Kor 11:1; 1Tes 1:6+;
Hib 6:12 * **13:8:** Mbo 102:27+; Mal 3:6; Yems 1:17 * **13:9:** Ro
14:17; Ep 4:14; Kol 2:4, 16+

ra tiravu imaat toman yavyavuun tiina. Ene eez tau Maaron itaghoni, leso sinj to Yesu ireu sosor to tamtamon, ve igham zi timin tamtamon tooni patabuyaana. *

¹³ Tauvene iit paam aat tapul lupuun to yes tau tizor Krisi na, ve tavot tala tooni. Ve isaav ighe tipamayanjin ghiit imin muun tigham pani, ene poia. Saa patanani tau tigham pait na, tabaado mon! *

¹⁴ Pa iit tawatagh: Taan tane, iit leen nugh tiina eta tau iit irau taleep pani taghon taghon gha ila ne mako. Ene tazuari ghiit pa Maaron nugh tooni. Nugh tawe, murei pale ivot ighazoon. *

¹⁵ Tauvene iit aat tapait Maaron ila Yesu eeza. Onoon kat, iit tau taghur ila to Yesu ve tavovotia eeza ne, avoon aat ipait Maaron irau saawe. Ene imin watoonrau toit ila pani. *

¹⁶ Ve agham poghania tamtamon ve arei gabua tsiam pazi. Ngar tauvene, lolomim iveegh pani sov. Pa ene watoonrau ite tau igham Maaron loolo poia. *

¹⁷ Aloon nginiina tsiam alinazi, ve aleep ila sambazi. Pa yes ta matazi payam ve tipaghazonjai gham pa lepoogh to anunumim. Ve murei, yes pale tiyooz ila Maaron naagho ve tipaesia uraat toozi pani. Tauvene yam aloon saveen toozi. Leso tigham uraat toozi toman lolozi poia. Isaav ighe monmon aghamgham patanani pazi, ene irau

* **13:12:** Mt 21:39; Yo 19:17+ * **13:13:** Lu 9:23; Hib 11:26, 12:2; 1Pe 4:14 * **13:14:** Pil 3:20; Hib 11:10, 12:22 * **13:15:** Mbo 69:30+; Ep 5:20; 1Pe 2:5 * **13:16:** Ro 12:13; Pil 4:18

uraat toozi iuul gham geeg mako. *

¹⁸ Nighason gham nighe aghur ghei ila sunjuun tsiam. Onoon, yei niyamaan taumai nighe ngar tsiei, ene ingalaan ila Maaron maata. Eemon apul sunjuun payei sov. Pa nighe ngar tsiei isov poia ve iduduun mon ila Maaron maata. *

¹⁹ Ve gabua ite tau lolog pani kat, ene naghe yam asun Maaron ariaan, leso iuul ghau ve rekia mon nalat naghit gham muul.

Saveen palotiin

²⁰⁻²¹ Tiina toit Yesu Kresi tau imaat ve Maaron ipaburigini pa mateegh na, i ta nginiin to sipsip, ve eeza tiina kat.

Sin tooni imalin, tauta ipariaan saveen mbuaan to eez paaghu to itinja Maaron tavalupu ghiit tamin eemon.

Eez tawe pale igheen tauvene taghon taghon gha ila. *

Ve Taama Maaron tau igham ghiit taleep poia toman loloon luuma na, pale irei ngar popoia maata maata payam, leso yam irau ataghon loolo.

Ve ila uraat to Yesu Kresi, i pale ipaburigin lolomim, leso agham ngar popoia ila i maata.

Tauvene iit aat tapait eeza irau saawe. Onoon.
*

Paesiin siriv

* **13:17:** 1Tes 5:12+; 1Tim 5:17 * **13:18:** Mban 24:16; Ro 15:30; 1Tes 5:25 * **13:20-21:** Yo 10:11; Hib 9:15+; 1Pe 2:25, 5:4
* **13:20-21:** Pil 2:13; 2Tes 2:16+

²² Yam tonvetaz, yau nabood saveeŋ tuuku ila rau tane to napalot gham. Ve naghason gham naghe aghur taliŋamim pani poi. Ambuzir sov.

²³ Yau napaes payam pa etaan ite Timoti: I, tipuli ivot pa ruum to yavyavuun wa. Ve isaav ighe ilam ivot rekia, ene aat yeiru nilat nightit gham.

²⁴ Agham aaz poia tsiei pa ŋginiinŋa tsiam, ve Maaron tamtamon tooni patabuyaana tisoŋ tau tileep izi ta sena. Yes to Itali tau yeŋa nilepleep ne, aaz poia toozi ilat payam paam.

²⁵ Poia to Maaron aat izaŋ to yam asov. Onoon.

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 11 Nov 2022 from source files dated 9 Oct 2020

adb844f0-d769-5b05-9dd0-7c01fca938bb